


Tul-iron ang mga kasaypanan ug pakusgon ang Partido! Hiusahon ug pangulohan ang lapad nga masa sa katawhang Pilipino sa pagsukol sa rehimeng US-Marcos! lasdang demokratikong rebolusyon sa katawhan!

Komite Sentral
Partido Komunista ng Pilipinas

Puno sa walay kinutuban nga rebolusyonaryong kalagsik, pagkamalaumon ug kalipay, ang Komite Sentral sa Partido Komunista sa Pilipinas nagpaabot sa labing mainitong militanteng pagtimba-ya sa tibuok myembro sa Partido sa okasyon sa ika-55 nga anibersaryo niini. Karong adlaw atong saulogon ang mga nahimo sa Partido ug tanang rebolusyonaryong pwersa sa miaging tuig sa pagpukaw, pag-organisa ug pagpalihok sa katawhan sa mga anti-imperyalista, anti-pyudal ug anti-pasistang pakigbisog ug pag-asdang sa demokratikong rebolusyon sa katawhan. Sa susamang higayon, ato usab nga puntingon ang atong mga kahuyangan, mga kaku-
langon ug mga kasaypanan aron tul-iron ug patigbabawan kini, ug maotikang og mas daku sa mosunod nga tuig.



Atong pasidunggan si Ka Jose Maria Sison, nangulo sa pagtukod sa Komite Sentral sa PKP, kansang ang usang anibersaryo sa iyang pagkamartir atong gidumdum nia-tong Disyembre 16. Pasidunggan usab nato silang Benito Tiamzon, Wilma Austria, Julius Giron, Mariano Adlao, Jorge Madlos, Menandro Villanueva, Antonio Cabanatan, Dionisio Micabalo, Eugenia Magpantay, Alfredo Merilos, Dennis Rodina, Agaton Topacio, Randall Echanis, Rosalino Canubas, Sandra Reyes, Ezequiel Daguman, Emmanuel Fernandez, Rolando Leyson Jr, Helenita Pardalis, Rogelio Posadas, Jude Fernandez, Josephine Mendoza ug tanang mga bayani ug martir sa katawhan ug rebolusyong Pilipino. Sa ilang tibuuk kinabuhi, nakahimo sila og dakung sakripisyo ug bililhong tampo sa kawsa sa katawhang Pilipino alang sa nasudnon ug katilingbanong kalingkawasan.

Kanunay pagahatagag bili sa Partido ang kabilin ni Ka Joma. Sulod sa kapin lima ka dekada, si Ka Joma usa ka walay kakapoy nga mamumuo sa rebolusyong Pilipino ug nagsilbing dili mapalong nga iwag niini. Dugang niyang gipalambo ang teorya sa Marxismo-Leninismo-Maoismo pinaagi sa pagdapat niini sa kongkretong kondisyon sa katilingbang Pilipino ug pagtakda sa estratehiya, taktika ug tahas sa rebolusyong Pilipino. Sa mas taas pang panahon, magpabiling mahinungdanong giya ang sinulat ni Ka Joma sa mga rebolusyonaryo ug demokratikong pwersa sa pagpaasdang sa na-

sudnon-demokratikong rebolusyon hangtud hingpit nga kadaugan.

Giila sa Komite Sentral sa Partido Komunista ng Pilipinas ang sakripisyo sa tanang proletaryong kadre ug myembro sa Partido nga padayon sa tiunay nga pag-alagad sa kawsa sa katawhang Pilipino alang sa nasudnong demokrasya ug sa sosyalistang panglantaw niini. Napuno sa komunistang diwa sa paghatag sa tanan nilang mahimo sa kawsa sa hut-ong mamumuo ug sa tanang naghagong katawhan, ilang giabaga ang tanang mabug-at nga tahas alang sa pag-asdang sa rebolusyon sa ilang mga natad sa responsibilidad.


Among gipaabot ang among rebolusyonaryong pagtimbaya sa liboan ka batan-ong kadre nga misalmot sa han-ay sa Partido sa maging mga tuig, ug mitampo og dakung kusog sa atong malungtarong pakigbisog. Daghan kaninyo ang mipas-an karon og importanteng tahas sa pagpangulo isip mga myembro sa sentral nga organo sa Partido, isip mga kumander ug upisyal sa pulitika sa Bagong Hukbong Bayan, ug mga lider sa rebolusyonaryong kalihukang masa sa kasyudaran ug kabanikanhan. Lalum nga nakagamot sa halapad nga masa sa mga mamumuo ug mag-uuma ang batan-ong henerasyon sa mga komunistang Pilipino nga nagpakita sa walay kinutuban nga determinasyon nga iasdang ang rebolusyong Pilipino sa umaabot.

Sa okasyon sa paghandum sa atong anibersaryo sa pagkatukod, gipadangat sa Komite Sentral ang pakighiusa sa tanang anti-imperyalista, progresibo ug demokratikong pwersa sa tibuok kalibutan nga naglunsad og militanteng pagsukol batok sa nasudnong pagpanglupig ug mga gubat agresyon. Among gipaabot ang inigsoonay nga pagtimbaya sa tanang proletaryong hut-ong sa tibuok kalibutan nga nagpasiugda ug nagdapat sa Marxismo-Leninismo-Maoismo sa konkretong kahimtang sa ilang mga nasud ug nangulo sa mga mamu-

muo ug naghagong katawhan sa ilang pakigbisog alang sa kalingkawasan ug sosyalismo.


Taliwala sa padayon nga krisis sa pangkalibutang sistemang kapitalista, padayon ang paggrabe sa daghang porma sa pagpangdaugdag ug pagpahimulos sa monopolyo kapitalismo o imperyalismo sa milyun-milyong mamumuo ug naghagong katawhan, ug pagpangawkaw sa kinaiyahan aron mapadaku ang ganansya. Nagbunga kini sa nagkagrabeng sosyo-ekonomikanhong kahimtang sa mayorya sa mga mamumuo ug naghagong masa sa mga sentro sa industriyal nga kapitalismo ug sa atrasado, semikolonyal ug semipyudal nga mga nasud. Nanghulhog og mga gubat ang mga monopolyo kapitalista. Padayon nilang gibuhian ang pasismo aron pugngan o babagan ang pagkusog sa rebolusyonaryong pagsukol nga gipangulohan sa proletaryado. Kaylap sa nangaging mga tuig ang nagkalapad nga katilingbanong kaguliyang ug nagkataas nga ang-ang sa pagsukol sa mga mamumuo ug uban pang naghagong katawhan.

Samtang padayon nga naglunang sa krisis ang pangkalibutang sistemang kapitalista, padayon usab nga migrabe ang dunot nga kahimtang sa semikolonyal ug semipyudal nga sistema sa Pilipinas. Dala sa lokal nga ekonomikanhon ug pulitikanhong krisis ang dili matungkad nga pag-antus sa katawhang Pilipino, ilabina sa mga mamumuo, mag-uuma ug uban pang naghagong katawhan kansang ang panginabuhi paspas nga mius-us ubos sa nagkakusog nga imperyalistang pagpangdaugdag ug pagpangawkaw. Labaw nga migrabe ang terorismo ug pulitikanhong pagpanumpo sa estado nga direktang gisuportahan sa imperyalismong US. Gitukmod sa maong grabeng mga kahimtang ang nagkadaghang katawhan nga militante ug kolektibong pakigbisugan ang ilang pulitikanhon ug ekonomikanhong katungod, ug iasdang ang rebolusyonaryong pagsukol aron makab-



ANG Bayan

Espesyal nga Isyu | Disyembre 26, 2023



ang.bayan@cpp.ph

Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas

ot ang ilang nasudnon demokrati- kong mga pangandoy.

Determinado ang Partido Ko- munista ng Pilipinas nga pangulo- han ang mga mamumuo ug lapad nga masa sa katawhang Pilipino. Samtang nagpakusog subay sa re- bolusyonaryong kalampusan sa mi- labayng 55 ka tuig, giila usab sa Partido nga ang suhetibismo ilabina sa porma sa empirismo miresulta sa mga kritikal nga kasaypanan ug tendensiya, mga kahuyangan ug mga kakulian sa natad sa ideolohi- ya, pulitika ug organisasyon nga mibabag sa paglambo niini ug sa dugang nga pag-abante sa demok- ratikong rebolusyon sa katawhan sa miaging pipila ka tuig. Aron mabun-

tog ug isalikway kining mga kasay- panan, nanawagan ang Komite Sentral sa tibuok Partido nga mag- lunsad og kalihukang pagtul-id su- bay sa Marxismo-Leninismo-Maois- mo ug sa mga bata kang prinsipyo sa Partido nga gihikyad ni Ka Joma.

Tumong sa kalihukang pagtul-id mao ang dugang pagpalig-on sa Par- tido pinaagi sa pagpataas sa teoreti- kal nga kahibalo ug rebolusyonar- yong praktika sa mga kadre sa Parti- do; pahugton ang ilang pagsabot sa Marxismo-Leninismo-Maoismo aron kritikal nga sumadahon ang nanga- ging mga kasinatian ug mokutlo og mga pagtulon-an ug dugang palam- buon ang teorya sa gubat sa kataw- han sa Pilipinas; pagsalikway sa su-

hetibismo ug sayop nga mga palisiya ug gawi; paghimo sa pagsaway sa kaugalingon aron mapataas ang de- terminasyon sa mga kadre sa Parti- do ug rebolusyonaryo nga makigbi- sog ug magsakripisyo alang sa rebo- lusyonaryong kawsa.

Padayon nga ginapalalum ug ginapalapad sa Partido ang pagga- mot sa masa. Determinado kining palapdon sa makapila ka pilo ang han-ay niini sa umaabot nga mga tuig aron abagahon ang dakung ta- has nga pangulohan ang milyun- milyong katawhang Pilipino sa da- lan sa pag-asdang sa gubat sa ka- tawhan ug sa nasudnon-demokrati- kong rebolusyon ngadto sa hingpit nga kadaugan.

I. Misangpot ang imperyalistang krisis sa nagkagrabeng kahimtang ug mga gubat

Nagkaguliyang ang kalibutanong sistemang kapitalista. Gipasamot niini ang upat ka dagkung kontradiksyon sa kalibutan— kontradiksyon tali sa monopolyong kapital ug proletaryado sa kapitalistang mga nasud; tali sa magkaatbang nga imperyalistang gahum; tali sa mga imperyalistang gahum ug dinaugdaug nga katawhan ug nasud; ug tali sa mga imperyalistang gahum ug mga nasud nga nanghingusog sa nasudnong soberanya ug sosyalistang mga pangandoy. Padayon ang pagtiurok niini sukad sa pangkalibutang lockdown niadtong 2020.

Bisan pa sa pitipiti nga pag-us- wag niadtong milabayng tuig, miba- lik kini sa dalan sa malungtarong is- tagnasyon ug pagkunhod samtang ang tibuok kalibutan naglunang sa utang ug kalisud. Ang mga kahim- tang sa krisis sa ekonomiya nagre- sulta sa pulitikanhong mga panag- bangi ug mga gubat. Sa pagpanguna sa US, padayong nakiggubat ang mga imperyalistang gahum sa Eas- tern Europe ug Middle East, sam- tang naghulga nga mangsulsol og dugang mga gubat sa ubang bahin sa kalibutan. Sa lain-laing mga na- sud, adunay kaylap nga katilingba- nong kagubot sa han-ay sa mga di- naugdaug ug gipahimuslang mga hut-ong nga misangpot sa pag-ulbo sa armado ug dili armadong pagsu- kol sa katawhan batok sa nagkagra- beng kahimtang sa imperyalistang pagpahimulos ug panaugdaug.

Kanunay ang pagtiurok sa krisis sa pangkalibutang monopolyo kapi- talistang sistema. Sulod sa kapin sa usa’g tunga ka dekada, ang ekono- miya sa kalibutan anaa sa kinati- buk-an ug malungtarong istagna- syon.

Ang krisis sa pinansya ug ekono- miya niadtong 2008-2009, nga naki- taan sa pagkahugno sa higitang mga bangko ug tibuok ekonomiya, ti- maan nga nahurot nga sa mga mo- nopolyo kapitalista niadtong mila- bayng panahon (gikan sa pag-abli sa kanhing Soviet Union human sa pag- kahagba niini niadtong 1991 ug sa hingpit nga integrasyon sa China sa kalibutanong sistemang kapitalista niadtong 2001) ang tanang pamaagi aron padayong padakuon ang ga- nansya pinaagi sa pagpahimulos sa kusog-pamuo ug pagkawaw sa na- tural nga bahandi, walay-hunong

nga ispekulasyon sa pinansya (*dotcom*, *real estate*, pabalay) ug hi- ganteng pagpangutang. Pakyas nga nasustine sa dinagkung kantidad sa kwarta (nga gitawag og pondo sa *quantitative easing* nga mokabat sa pipila ka trilyong dolyar) nga gisak- sak sa nag-unang mga kapitalistang guberno ang pagpadaku sa mono- polyo-kapitalistang ganansya. Ang ekonomiya sa US ug sa uban pang nag-unang industriyal kapitalistang nasud napakyas sa paghibalik sa kanhing mga ang-ang sa paglambo.

Mitataw ang malukpanong pag- kalangan sa suplay, produksyon ug komersyo sa mga korporasyong transnasyunal, nga nagtukmod sa gatusan ka milyong mamumuo ug naghagong katawhan sa sosyo-eko- nomikanhong krisis. Gipahimuslan ang sitwasyon aron hatagag kataru- ngan ang paggamit sa dagkung kan- tidad sa pondo sa estado aron pa- lagsikon ang konsumo, suportahan ang ganansya sa mga korporasyon ug palagsikon ang mga merkado sa pinansya. Gipalutaw niini ang mga ekonomiya niadtong 2020, ug mire- sulta sa pag-untol sa paglambo niadtong 2021-2022, apan nagre- sulta usab sa dakung pagbusikad sa

utang ug taas nga implasyon nga nagpabug-at sa ekonomiya sa kalibutan sa milabayng tuig. Niadtong unang kwarto sa 2023, ang kalibutanong utang mikabat sa \$397 trilyon, 349% nga mas daku kaysa kalibutanong *gross domestic product* (GDP o kinabuk-ang kantidad sa produksyon).

Nagpakindang-kindang ang ekonomiya sa US tungod sa hinay nga paglambo sa milabayng 15 ka tuig. Gikan sa abereyds nga 3.62% niadtong 1961-1990, ang tinuig nga paglambo sa ekonomiya sa US mius-us ngadto sa 2.99% sa tunga-tunga sa 1991 ug 2008, ug sukad kaniadto mihagba kini ngadto sa 1.69%. Human mius-us og 2.3% niadtong 2020, mibalik sa 5.8% ang ekonomiya sa US niadtong 2021, apan mius-us balik ngadto sa 2.1% niadtong milabayng tuig. Kapin \$33 trilyon ang utang sa gubyernong pederal sa US ug lagmit nga modaku pa human gisuspinde sa gubyernong Biden ang balaod nga nagatakda sa kantidad sa pwedeng utangon hangtud 2025.

Nahagba sa resesyon ang ekonomiya sa Germany (ang pinakadaku sa Europe) sa katapusang kwarto sa 2022 hangtud sa unang kwarto sa 2023 (0.3% nga pagkunhod). Mibalik kini sa resesyon niadtong Mayo, ug gilauman nga subling mahagbong sa resesyon sa mosunod nga tuig. Anaa sa bingit sa resesyon ang UK ug France ug parehong gilau-mang molambo lamang og 0.6% karong tuiga. Anaa pa gihapon sa dinugay nga istagnasyon ang Japan. Sukad 2008, ang pag-uswag sa Japan nag-abereyds lamang og 0.27%, gikan sa 7.29% niadtong 1961-1979, 2.91% niadtong 1980-2000, ug 1.45% niadtong 2001-2007. Mitubo lamang kini sa 2.14% ug 1.03% niadtong 2021 ug 2022, human mihagba og 4.28% niadtong 2020. Gilauman nga modaku lamang kini og 0.4% karong tuiga.

Miuswag lamang og 2.99% ang China niadtong milabayng tuig, layo sa kanhing tantos nga 9% pagtubo niadtong 2000-2019. Kasamtangang ginapahinay kini sa mga hul-

ga sa pagpbuto sa bula sa *real estate*. Ang Evergrande Group, usa sa pinakadakung property developer sa China mideklara sa pagkabangkarota human wala makabayad sa \$300 bilyong utang, nga gisundan sa susamang pagkabangkarota sa uban pang dagkung kumpanya sama sa Kasia, Fantasia ug Shimao Group. Nag-atubang usab ang China sa hulga nga dili mabayaran sa mga nasud ang binilyong utang dinhi.

Sa US ug uban pang kapitalistang nasud, nakasinati ang mga mamumuo ug naghagong katawhan sa lapad nga disempleyo ug ubos nga suhulan, lakip na ang klase-klase-seng mga katilingbanong problema sama sa kawalay puluy-anan, kagutom, mahal kaayong serbisyo sa panglawas, pagkalubong sa utang sa mga estudyante ug uban pa. Milyun-milyong katawhan nga dili Puti ug mga mamumuong migrante ang nag-antus sa rasismo, ingonman sa panatisismo sa relihiyon ug pasismo. Ang mga dinaghang pagpamusil sa matag adlaw hulga sa kinabuhi sa mga tawo.

Mga atrasado ug semikolonyal ug semipyudal nga nasud ang milangkub sa mayorya sa mga nasud sa kalibutan, ilabina sa Asia-Pacific, Latin America, Middle East ug Africa. Padayong mitaas ang pangpublikong utang sa maong mga nasud sa pagsulay sa mga gubyrno dinhi nga bayaran ang mga depisito sa patigayon bunga sa nagkadakung gasto sa pag-import. Sa gitawag og lambo nga mga nasud, anaa sa 20% sa kita sa mga gubyrno ang napadulong sa pagbayad sa utang. Kapin 60% sa maong mga nasud ang nameligrong dili makabayad sa utang, sama sa krisis sa Sri Lanka niadtong 2022.

Ang mga mamumuo, mag-uuma ug uban pang anakpawis sa mga atrasadong nasud pare-parehong nag-atubang sa mga katilingbanong problema sama sa dugay nang lapad nga disempleyo, daw ulipong suhulan, kawalay yuta, kawalay puloy-anan, mahal nga serbisyo sa panglawas ug uban pang katiling-

banong serbisyo, lakip na ang pulitikanhong pagpanumpo.

Migrabe ang walay kaangayan sa katilingban samtang labaw nga nakakonsentra sa kamot sa pipila ka multi-bilyunaryo ang bahandi. Adunay 2,640 bilyunaryo nga adunay gikumbinang \$12.2 trilyon, kung asa 75% niini ang anaa sa lima lang ka nasud (US, Chian, India, Germany ug Russia). Adunay 724 bilyunaryo sa US, ang 400 nga pinakadaku niini naggunit og \$4.5 trilyon. Ang 20 ka pinaka-adunahan labaw pang midaku ang bahandi og 20%-30% niadtong milabayng tuig.

Padayong ginabira paubos ang kapitalistang sistema sa kalibutan sa walay kasulbaran nga krisis sa sobrang produksyon ug paghagba sa tantos sa ganansya. Adunay sobrang produksyon sa mayor nga mga igbabaligya sama sa lana, elektroniks (semikonduktor), mga grano ug uban pa. Ang kapitalistang kumpetisyon ug anarkiya sa produksyon padayon nga misangpot sa walay hunong nga pagkawakaw sa bahandi sa kalibutan, kapitalistang polusyon, pagguba sa kinaiyahan, krisis sa klima ug pagkawala sa *biodiversity*, nga nagkinaiya sa sagad nga katalagman (mga sunog ug baha) nga miguba sa dakung bahin sa kalibutan. Ang monopol-yong kapitalismo nagpasabot sa nagkaigting nga kumpetisyon sa ekonomiya ug bangi sa pulitika sa mga kapitalistang gahum. Samtang ginapahamtang ang liberalisasyon sa ubang mga nasud, ginapatuman usab sa US sa kaugalingon niining nasud ang mga proteksyunistang palisiya sa patigayon ug industriya pabor sa mga kumpanyang US, ug ang direktang pagpamuhunan sa estado sa industriyang semikonduktor, green energy ug uban pa.

Padayong nagkakusog ang mga hulga sa gubat tali sa mga mayor nga imperyalistang gahum tungod sa agresibong paghingusog sa US sa paghari sa kalibutan atubangan sa mga paghagit sa hegemonya niini. Dakung rekursong gibubu niini sa gasto sa militar. Niadtong milabayng tuig, midaku og \$2.24 trilyon

(3.37% nga mas taas sa milabayng tuig) ang gasto sa depensa. Kapin 56% sa tanang gasto sa militar, ug 61% sa tanang eksport sa mga armas gunit sa US, China ug Russia.

Kapin 20 ka bulan na ang *proxy war* sa US ug Russia sa Ukraine nga ginagamit nga peyon sa alyansang militar nga US-NATO. Migasto ang Russia og \$81.7 bilyon niadtong 2022, ug mogasto og \$120 bilyon karong 2023 ug \$132 bilyon sa 2024 nga nagpakusog sa produksyon sa mga pabrikang militar. Mikabat na sa \$75 bilyon ang gihatag nga ayuda sa US sa Ukraine, lakip ang \$44.2 bilyong ayudang militar, nga labaw pang nagpalanat sa armadong panagbangi. Ang labing nakapahimulos sa gubat sa Ukraine mao ang mga kumpanyang Amerikanong nagahimo og armas sama sa Lockheed Martin, Raytheon, Northrop ug Boeing.

Dungan niini, plano sa US nga ihatag ang \$14.5 bilyong pakete sa ayudang militar sa Israel aron suportahan ang Zionistang pagpamomba ug okupasyon sa Gaza, nga mipatay na og halos 19,000 gikan Oktubre 7. Ang gipakusog nga suporta sa US sa Israel kabahin sa duso niining kontrolon ang mga bahandig lana batok sa Iran ug uban pang nasud sa Middle East nga nagaduso sa ilang kaugalingnan. Tungod sa pagdumili sa US nga suportahan ang singgit sa tibuok kalibutan alang sa hunong-buto sa Gaza isip pagsuporta sa pagpamomba sa Israel, labaw kining nahimulag sa tibuok kalibutan.

Padayon usab nga ginapakusog

sa US ang laraw niining iduso ang hegemonya sa rehiyong Asia-Pacific, subay sa estratehiya niining pugngan ang paglapad sa imperyalistang kaaway nga China. Nagdeploy ang US og duha ka *carrier strike group*, usa (USS Nimitz) sa South China Sea, ug usa pa (USS Ronald Reagan) sa Japan. Gisulsulan niini ang pagbulag sa Taiwan sa China, ang pagduso sa katungod sa Pilipinas sa kadagatan ilalum sa United Nations Convention on the Laws of the Seas (UNCLOS), ug mga panagbangi sa Korean *peninsula*, aron hagiton ang China nga maghimo og mga aksyong agresibo nga mamahimong moresulta sa direktang kumprontasyong militar.

Ang pagpanghingusog sa US sa hegemonya niini gisugat sa mga karibal niini nga maghiusa sa militar ug ekonomiya. Padayong gipakusog sa China ug Russia ang Shanghai Cooperation Organization, ang alyansang pangseguridad nga gilangkuban sa India, Kazakhstan, Kyrgyzstan, Pakistan, Tajikistan ug Uzbekistan. Gipangulohan usab sa China ug Russia ang mga paningkamot nga magtukod og mga alyansa sa ekonomiya, pamatigayon ug pinansya nga wala nahikot sa dolyar sa US. Padayon usab nga ginapakusog sa North Korea ang relasyon sa militar ug ekonomiya niini sa Russia ug China.

Gihimugso sa imperyalistang krisis ug panagbangi ang paborableng kundisyon sa makanunayong pagkusog ug pag-abante sa mga pakigbisog sa mga mamumuo ug kalihukang anti-imperyalista sa mga kapitalistang nasud, ug mga demokratikong

pakigbisog sa masa ug rebolusyonaryong pagsukol alang sa nasudnon ug katilingbanong paglingkawas gikan sa imperyalistang kontrol ug dominasyon sa mga semikolonya, ug alang sa sosyalistang rebolusyon.

Miulbo ang mga mayor nga welgang mamumuo sa United States lakip ang welga sa United Auto Workers ug sa Hollywood Writers and Actors. Sa Europe, nagwelga ang mga mamumuo sa transportasyon sa Italy, Spain ug UK. Mayor nga mga welga usab ang gilunsad sa mga mamumuong panglawas sa UK, mga mamumuo sa riles ug mga empleyado sa guberno sa Germany, ug uban pa. Makasaysayanong mga pangmasang demonstrasyon ug martsa sa milyun-milyong katawhan ang gilunsad sa lain-laing bahin sa kalibutan batok sa henosidyo sa US-Israel batok sa mga Palestino.

Padayong nagdilaab ang mga rebolusyonaryong armadong pakigbisog sa lain-laing bahin sa kalibutan. Sa kasamtangan, kusganong ginaaslang sa mga rebolusyonaryong pwersang Palestino ang armadong pagsukol sa ilang yutang-natawhan batok sa bangis nga pagpamomba ug henosidyo sa Zionistang Israel nga suportado sa US. Sa Myanmar, ginasuklan sa mga etnikong hukbo ang pasistang huntang Tatmadaw ug nagpakusog sa mga opensibang gerilya sa milabayng mga bulan. Aduna usay mga rebolusyonaryong armadong pakigbisog nga ginapangulohan sa mga partido komunista sa India, Turkey, Kurdistan, Colombia, Pilipinas ug sa uban pang nasud.

II. Ang grabeng krisis sa sistemang semikolonyal ug semipyudal padayong naghimugso og pagsukol

Labaw pang migrabe ang krisis sa nagharing semikolonyal ug semipyudal nga sistema sa Pilipinas nga grabeng nagpaantus sa katawhan. Tataw sa maong krisis ang padayon nga pagtiurok sa ekonomiya nga direktang nakahikot sa krisis sa kalibutanong sistemang kapitalista, ug sa paspas nga paghait sa krisis sa pulitika nga nagpakita sa internal nga bangi sulod sa nagharing pundok, paghimulag sa rehimeng US-Marcos human lamang ang usa ka tuig sa poder, ug ang padayon nga pagtigum og kusog sa mga pwersang demokratiko ug patriyotiko.

Adunay lapad ang pagkaguba sa mga lokal nga pwersa sa produksyon nga misangpot sa pag-ubos sa produksyon (pareho sa manupaktura ug agrikultura). Nagresulta kini sa malukpanon nga disempleyo, labaw nga pagsalig sa mga imported nga produkto para sa konsumo, ug pagsaka

sa mga presyo.

Wala pa gihapoy kaugalingong mga nasudnong industriya ug kapasidad ang nasud nga mugnaom ang mga bata kang panginahanglan sa katawhan. Ang lokal nga produksyon nagsalig pa gihapon sa pag-import, ug nakasandig pa gihapon sa pag-eksport og mga produktong *semiprocessed* nga kabahin sa kalibutanong *assembly line* nga titawag usab og "global value chain" sa mga monopolyo kapitalista, mga hilaw nga produktong para sa agrikultura ug mga batong mineral. Nagsilbi ang mga *export processing zone* nag-una isip sentro sa *semiprocessing* (asembliya ug manwal nga pag-inspeksyon) sa naunang gi-import nga mga pyesa nga subling ginaksport sa labing gamay nga dugang bili.

Tungod sa pagkahagba sa kalibutanong ekonomiya, lagmit nga grabeng maapektuhan dinhi ang sistemang nagsalig sa import ug nagsandig sa eksport nga gipatuman sa milabayng mga rehimen ug sa kasamtangang rehimen Marcos. Labaw nga mopaspas ang paggrave ug paglalum sa krisis sa ekonomiya sa Pilipinas sa umalabot nga tuig. Padayon nga migamay ang kinatibuk-ang bolyum sa patigayon sa milabayng duha ka tuig nga nagsalamin sa kalibutanong pamatigayon taliwala sa sobrang suplay ug paghinay sa pagmanupaktura. Padayong migamay ang eksport sa mga pyesang elektroniko, nga naglangkub sa bulto sa *semiprocessing* sa Pilipinas, sukad sa pagsugod sa tuig.

Dili malilong sa mga engrang deklarasyon ni Marcos ug sa iyang mga *economic manager* (tigdumala sa ekonomiya) sa multi-bilyong dolyar ang mga "saad sa langyawng pamuhunan" ang kamatuuran nga padayon ang paggamay sa direktang pamuhunan sa mga langyaw sa Pilipinas gikan \$11.9 bilyon niadtong 2021 ngadto sa \$9.2 bilyon niadtong 2022, nga padayong miubos og 15.3% sa unang tulo ka kwarto sa 2023. Adunay pipila ka

mga langyawng kumpanya ang nagbalhin sa ilang operasyon sa Pilipinas ngadto sa ubang nasud nga mas ubos ang gasto sa pamuo.

Sa kawalay tinuod nga reporma sa yuta, nagpabiling ginagmay ug atrasado ang lokal nga produksyon sa agrikultura alang sa lokal nga suplay sa pagkaon. Nagkataas ang gasto sa produksyon tungod sa taas nga presyo sa mga abuno, pestisidyo ug gasolina. Ang taas nga abang sa yuta ug uban pang porma sa pyudal ug semipyudal nga pagpangdaugdaug labaw pang nagpaubos sa kita sa mga mag-uuma nga nagresulta sa malukpanong kalisud ug kagutom sa kabanikanhan. Ang walay-hunong nga pag-import ug ismagling sa bugas, sibuyas, ahos ug uban pang produktong pang-agrikultura dugang nga nagpaantus sa masang mag-uuma, ug sa tanang katawhang Pilipino.

Grabe pa, lapad nga yutang agrikultural ang gipailalum sa kumbersyon sa dagkung burgesya-kumprador gamit ang langyawng kapital alang sa *real estate* ug uban pang kapuslanan. Sa konserbatibong pagbanabana sa guberno, dili moubos sa 620 ka libong ektarya sa irigadong yuta ang gikumbert sa milabayng dekada (2012-2022). Nagresulta kini sa dislokasyon sa minilyong pamilyang mag-uuma ug paggrave sa pagantus sa kabanikanhan.

Labaw nga nagsalig sa utang ang nasud aron ipanggasto sa patigayon ug sa guberno. Mikabat sa ₱14.48 trilyon ang utang niadtong Oktubre, ug gilaumang motaas pa og ₱15.84 sa sunod tuig. Padayong midaku ang pondo sa pagbayad sa pangpublikong utang. Sa 2024, mokabat kini og ₱1.91 trilyon, nga gilangkuban sa ₱1.24 trilyong bayad sa prinsipal; ug ₱670.5 bilyong awtomatikong nakagahin sa pagbayad sa interes nga naglangkub sa 11.6% sa nasudnong badyet (mas taas kumpara sa 9.7% niadtong 2020).

Sa kawalay bata kang mga industriya, nasinati sa katawhang Pilipino ang makanunayong lapad nga

disempleyo. Kanunay ginapagamay sa datos sa guberno ang tinuod nga tantos sa lapad nga disempleyo pinaagi sa minadyik nga estadistika. Ang gideklarang 4.2% nga tantos sa disempleyo niadtong Oktubre 2023, pinakaubos kuno sa milabayng 18 ka tuig, kinahanglan kritikal nga isalikway. Gani, anaa sa 39.46 milyon (o 79.1% sa pwersa sa pamuo nga 49.89 milyon), (2.1 milyon) ang dili hingpit nga walay trabaho o (2 milyon) ang halos walay trabaho isip mga katabang, (13.3 milyon) ang "self-employed", (1.3 milyon) ang nagtrabaho sa kaugalingong yuta, (3.1 milyon ang dili sweldado, ug 120,000 ang sweldado) nga mga nagtrabaho sa negosyo sa pamilya, ug (17.6 milyon) ang mga mamumuo sa mga empresang dili pormal.

Tungod sa grabeng problema sa disempleyo, milyun-milyong Pilipino ang nanimpalad nga makatrabaho sa ubang nasud isip mga katabang, *caregiver*, nars, mamumuo sa konstruksyon, ug mga tripulante sa mga internasyunal nga kumpanya sa barko. Bulnerable silang mga target sa mga kriminal nga ahensya sa rekrutment ug mga burukrata sa guberno nga ginahuthut ang ilang kita ug tinigum. Daghan ang nakasinati sa dili makatawhanong kondisyon ug pabug-at nga mga balayrunon sa guberno, gawas pa sa grabeng epekto sa pagbulag sa ilang mga pamilya.

Ang bagang hukbo sa mga walay trabaho mibira paubos sa suhulan. Nag-antus ang mga mamumuong Pilipino sa daw ulipong suhulan. Ang inadlawan nga suhulan sa nasud nga ₱341 ngadto sa ₱641 kulang kaayo aron tubagon ang inadlawan nga panginahanglan sa lima-ka-tawong pamilya nga gibananang anaa sa ₱1,188 (niadtong Nobyembre) nga gibunga sa pagsaka sa presyo sa lana, pagkaon ug uban pang bata kang panginahanglan ug mga serbisyo.

Wala pa hingpit nga nakabawi ang mamumuong Pilipino ug naghangong katawhan sa pagkahagba sa ilang panginabuhì gikan sa

lockdown niadtong pandemyang Covid-19. Labaw pang migrabe ang ilang sosyo-ekonomikanhong ka-himtang taliwala sa ubos nga suhulan, disempleyo, kakulang sa kita o tinugum, ug nagkataas nga presyo. Mayorya sa mga Pilipino ang nabuhi ilalum sa ganghaan sa kalisud (*poverty threshold*). Milyun-milyon ang giilugan og yuta ug panginabuhian sa mga langyawng kapitalista nga gustong kontrolon ang nahabiling mga suuk sa ekonomiya sa Pilipinas.

Atubangan sa malukpanong kalisud ug kagutom, labaw nga miulbo ang kasilag sa katawhang Pilipino sa nagharing pundok sa mga Marcos-Duterte. Nahimulag si Marcos Jr sa lapad nga masa sa katawhan nga nalagot sa iyang pag-angkon sa \$10 bilyong kinawat nga bahandi sa iyang diktador nga amahang si Marcos Sr sa panahon sa balaod militar niadtong 1972-1986. Labaw niyang gipasuko ang katawhan tungod sa walag too nga paglu-linghayaw sa gawas sa nasud ug kaharuhay, ug dayag nga korapsyon. Pinaagi sa Maharlika Fund, hangtud ₱550 bilyon sa pondong pangpubli-ko ang pagagunitan ni Marcos ug ibalhin sa pribadong pamuhunan, nga magadala sa kroniyismo sa bagong ang-ang sa kadunot. Labaw nga gikasilagan sa lapad nga masa sa katawhang Pilipino si Marcos tungod sa regular mga pagpa-*cater* og kumbite o pagsalusalo sa Malacañang ug ang planong mag-usik-usik og ₱1.1 bilyon sa mga biyahe sa 2024.

Labaw usab nga nahimulag ang rehimeng Marcos sa katawhang Pilipino tungod sa pagpakaitoy niini sa imperyalismong US ug pagyukbo sa China. Ginapagamit ni Marcos ang iyang guberno isip paon sa agresibong pagduso sa US nga konsolidahon ang hegemonya niini sa Pilipinas ug sa Asia-Pacific, aron kontrahon ang pagkusog sa militar ug ekonomya sa imperyalistang karibal niining China

Sa ilalum ni Marcos, labaw nga ginadamay ang Pilipinas sa nagka-

kusog nga panagbanging militar sa US ug China. Sa kapin usa ka tuig lamang sukad nga nakalingkod sa gahum, gitugutan ni Marcos ang US nga magtukod og upat pa ka mga pasilidad militar (dugang sa kanhing lima) sa mga "gikauyunang lokasyon" sulod sa mga kampo sa Armed Forces of the Philippines (AFP) sama sa nahisukip sa Enhanced Defense Cooperation Agreement (EDCA). Ang maong mga pasilidad magamit sa pagtukod og mga sistema sa misayl sa US ug para maghan-ok ug magpwesto og mga armas, subay sa estratehiya sa US nga liyukan ang China sa mga pwersang militar gikan sa gitawag og "first island chain."

Labaw nga migrabe ang interbensyong militar sa US sa Pilipinas sa milabayng tuig atubangan sa sunud-sunod nga mga pangmilitar nga aktibidad ug mga *war exercises* sa US. Sa sunod tuig, sobra sa 500 ka mga *wargames* ug ehersisyong militar ang pagalunsaron sa US sa nasud. Sa duso sa US, planong mosulod sa mga "visiting forces agreement" ang Japan ug France, aron tugutan ang maong mga alyado sa US nga pakusgon ang presensyang militar sa nasud ug sa rehiyon.

Sa hulhog sa mga tigtambag militar sa US, naglunsad ang AFP ug Philippine Coast Guard sa balik-balik nga "supply mission" sa mga bantayan o *outpost* sa Pilipinas sa Kalayaan Group of Islands, nga adunay suporta sa mga eroplano ug *drone* nga pangsurbeylans sa US. Labaw nga nahimong agresibo ang China sa pagpamomba og tubig ug pagbangga sa gagmayng bangka sa mga Pilipino sulod sa *exclusive economic zone* sa Pilipinas, nga dayag nga paglapas sa kaugalingnan ug katungod sa kadagatan sa Pilipinas.

Sa dikta sa US, gikansela sa gubjernong Marcos ang mga utang ug kontrata sa guberno nga gipondohan sa China alang sa mga proyektong Philippine National Railways South Long Haul, Subic-Clark Railway ug Mindanao Railway, pa-

bor sa mga pautang gikan sa World Bank ug Asian Development Bank. Ginaduso usab ang pagkansela sa uban pang proyektong ginapondohan sa China sama sa Samal Island-Davao City Connector project, Chico River Pump Irrigation Project, New Centennial Water Source (Kaliwa Dam Project), ug mga proyektong CCTV (*closed-circuit television*) sa Marikina, Parañaque, Pasig, San Juan ug Valenzuela, nga ang kadaghanan gikontrata pa sa milabayng rehimeng Duterte.

Ang duso sa US nga pagpukan sa China pag-atras gikan sa dugay nang panagkonsabuhay sa duha ka imperyalistang gahum sa pagpahamtang sa mga neoliberal nga palisiya sa Pilipinas gikan dekada 1990, kung asa nahimong magpalapad sa oligarkiya sa pinansya sa China sa operasyong komersyal ug pinansya sa Pilipinas, uban sa mga bangkong US ug Japanese, ug magpundar og kaugalingon niining base sa han-ay sa mga burgesy-kumprador ug burukrata-kapitalista. Sa pagpugong sa akses sa kapital sa China, gipagamay sa imperyalismong US ang bahinay sa pinansya sa mga nagharing hut-ong, nga nagpagrabe sa panagbangi sa magkaaway nga pundok.

Kapin usa ka tuig lamang sukad nga gipanghinambog sa mga Marcos ug Duterte ang "unity team" nga nakahimo og "landslide victory" pinaagi sa "automated" nga paglimbong sa eleksyong 2022, nabutyag gilayon ug nahimong makalanag ang bangiay sa mga nagharing paksyon. Gikonsolida sa mga Marcos ang ekonomikanhon ug pulitikanhong gahum, samtang paspas nga gakahutdan og ekonomikanhon ug pulitikanhong gahum ang mga Duterte (lakip na ang mga Arroyo). Ang kanselasyon sa dagkung kontrata sa imprastruktura tali ni Duterte ug sa China naghikaw kanila sa bilyun-bilyong pisong kikbak. Ang negosyo sa pinakadakung kroni ni Duterte nga si Dennis Uy paspas karon nga ginabaligya, pabor sa mga kroni ni Marcos. Bisan og gikatuuhang adu-

na pay dakung impluwensya si Duterte sa AFP ug PNP, daghan na ang mga heneral nga gituboy ni Duterte ang nagretiro na. Sa milabayng mga bulan, gipagrabe sa pundok sa mga Marcos-Romualdez ang mga atakeng nakatarget sa mga Duterte, pinaagi sa pagtangtang sa ₱550 milyong "confidential and intelligence funds" ni Vice President Sara Duterte, ug pagduso nga tangtangan og prangkisa ang maki-Duterte nga istasyong SMNI, ug pag-abli sa pultahan aron tugutan ang International Criminal Court nga ipadayon ang imbestigasyon batok kang Rodrigo Duterte sa mga kaso sa krimen batok sa katawhan niadtong panahon sa iyang mini nga gubat kontra-droga.

Ang panagbangi tali sa pundok sa mga Marcos ug Duterte hapit nang mosangpot sa bangis nga komprontasyon. Dayag nga ginasa-way sa mga Duterte si Marcos sa planong banhawon ang panaghisgot kalinaw sa National Democratic Front of the Philippines. Ang pipila sa bag-ong-retirong heneral sa militar nga matinud-anon kang Duterte nangalap og suporta sa mga upisyal militar ug negosyante aron manghulhog og kudeta aron palagputon si Marcos ug magtukod og huntang sibil-militar. Adunay kahibalo niini ang *chief-of-staff* apan nagpakahilum sa aktibidad sa mga nagaplano og kudeta.

Aron konsolidahon ang pulitikanhong gahum, gipahugot sa rehimeng Marcos ang kontrol sa militar nga adunay suporta sa US. Gipadayon ug gipagrabe niini ang palisiya ni Duterte sa terorismo sa estado ug ginapatuman ang pasistang atake batok sa nasudnon-demokratikong pwersa sa kasyudaran ug kabanikanhan, ilabina ang mga myembro ug organisador sa mga unyon ug kahugpungan sa mga komunidad. Nagatunhay ang *de facto* nga balaod militar sa tibuok nasud. Pipila ka mga komunidad sa mga kabus sa kasyudaran ang nakapailalum sa habagang presensya ug pagmonitor sa mga sundalo. Gina-

pailalum sa AFP ang mga komunidad sa kabanikanhan sa kontrol sa militar, ginapig-ot ang mga ekonomikanhon ug katilingbanong aktibidad sa komunidad pinaagi sa korpyu ug restriksyon, ug ginakontrol ang lihok sa populasyon sa ngalan sa "kontra-insurhensiya."

Walay puas ang mga ekstrahudisyal nga pagpamatay ug uban pang paglapas sa tawhanong katungod ug internasyunal nga maki-tawhanong balaod sa kabanikanhan nga binuhatan sa mga reaksyunaryong armadong pwersa, pulis ug paramilitar. Ginapailalum ang mga tawo sa grabeng sarbeylans ug mga pagpangdagit, tortyur, interogasyon ug pagpasaka og hinimu-himong mga kaso gamit ang gitawag og Anti-Terrorism Law. Ginalunsad ang pagmasaker sa mga nag-operasyong tropa sa mga batalyong pangkombat sa AFP. Atol sa mga operasyong militar, gipailalum ang mga komunidad sa pagpamomba gikan sa kahanginan ug pagpangan-yon.

Sa suporta sa US, mikusog pa ang maong mga atakeng sa milabayng tuig subay sa deklarasyon sa AFP sa "final push" (katapusang duso) batok sa giila niining mga "salin" sa pwersa sa Bagong Hukbong Bayan. Kapinkun-kulang 150 ka batalyon sa mga pwersang pangkombat sa militar, pulis ug paramilitar ang nakadeploy batok sa mga gerilyang nataran sa BHB sa tibuok nasud. Laraw sa imperyalismong US nga tapuson na sa gubyernong Marcos ang rebolusyonaryong armadong kalihukan aron hingpit niining magamit ang AFP sa pagpanghagit og gubat sa China. Hingpit nga nasayod ang US nga anaa sa posisyon ang rebolusyonaryong kalihukan nga pahimuslan ang posibilidad sa usa ka inter-imperyalistang gubat aron kusganong iaslang ang gubat sa katawhan.

Samtang ginalunsad ang brutal nga gubat sa pagpanumpo batok sa katawhan ug sa ilang rebolusyonaryong pwersa, ginagamit karon sa rehimeng US-Marcos ang "prokla-

masyong amnestiya" niini ug pasinang paningkamot nga banhawon ang panaghisgot kalinaw aron haylohon ang mga Pulang manggugubat sa Bagong Hukbong Bayan nga masurender. Samtang gikalipay sa Partido ug mga rebolusyonaryong pwersa, pinaagi sa National Democratic Front of the Philippines, ang oportunidad nga makighisgot kalinaw isip dugang nga natad sa pakigbisog aron iaslang ang nasudnon-demokratiko kawsa isip basihan sa makatarunganon ug malahutayong kalinaw, hugot usab nilang ginasalikway ang mga reaksyunaryong pakana nga gamiton ang panaghisgot aron mapasurender ang rebolusyonaryong kalihukan. Padayong manlimbasog ang NDFP Negotiating Panel nga iduso ang subling pagpadayon sa panaghisgot kalinaw subay sa naunang mga kasabutan.

Taliwala sa krisis sa ekonomiya ug pulitika sa nagharing sistema, labaw nga nagmatinguhaon ang katawhang Pilipino nga ilunsad ang mga pakigbisog sa masa aron panalipdan ang ilang mga sosyo-ekonomikanhon ug demokratikong katagud batok sa anti-katawhan ug madaugdaugong mga progama sa ekonomiya, korapsyon ug pulitikanhong pagpanumpo ilalum sa rehimeng US-Marcos. Labaw nga mitataw nga sa pag-alagad sa makihut-ong nga interes sa dagkung burgesya-kumprador ug dagkung agalong yutaan, sa pagsunodsunod sa langyawng interes sa ekonomiya, sa dinagkung korapsyon sa porma sa mga kikkak ug kroniyismo, ug sa maluho nga kinabuhi—ang rehimeng Marcos ang responsable sa kaylap nga kalisud ug pagpangdaugdaug sa lapad nga masa sa katawhang Pilipino.

Ang nagharing pundok sa mga Marcos-Duterte paspas nga nahimulag sa katawhang Pilipino. Ang lapad nga nagkahiusang prente nga gilangkuban sa mga bata kang hutong, hatungang pwersa ug mga taktikal nga alyado padayon nga nagkakusog batok sa nagharing rehimen tungod sa mga palisiya niining

anti-katawhan ug anti-nasyunal, korapsyon ug krisis sa ekonomiya. Nag-atubang karon ang nagharing rehimen sa lapad nga pagsukol.

Adunay nagkadakung kasilag sa mga mamumuo sa pagbalibad sa rehimen Marcos nga paminawon ang ginapangayo nilang mahinungdanong pagsaka sa suhulan. Dakung insulto alang kanila mumho nga dugang-suhulan nga gimando ni Marcos pinaagi sa mga *regional wage board*. Adunay pipila ka welga nga miulbo nga lagmit sinugdanan sa mas lapad nga kalihukang masa sa mga mamumuo aron mag-union ug iaslang ang hiniyang pakigbisog sa umalabot nga panahon. Nagwelga ang mga drayber ug operetor sa dyip ug uban pang pangpublikong transportasyon sa sunud-sunod nga paglunsad og hunong-pasada batok sa anti-kabus ug anti-katawhan nga "franchise consolidation" aron i-phase out ang mga dyip subay sa proyektong "transport modernization" sa World Bank ug Asian Development Bank.

Nagprotesta usab ang mga magtutudlo sa pangpublikong eskwelahan, mga mamumuong panglawas ug mga empleyado sa gubyerno aron pangayoon ang dugang nga sweldo ug batukan ang pulitikanhong pagpanumpo. Misalmot ang mga estudyante sa mga

aksiyong masa aron batukan ang dugang komersyalisasyon sa edukasyon, pag-abandona sa estado sa edukasyon ug pagpanumpo sa kampus. Sa lain-laing bahin sa nasud, miulbo ang mga protestang masa sa mga komunidad sa kabanikanhan aron batukan ang pagsulod sa magun-ubong mga langyawng operasyon sa mina, pagpangilog ug kumbersyon sa yuta, ug aron ipakigbisog ang mga antipiyudal nga pangayo sa masang mag-uuma.

Adunay mga aksiyong protesta usab batok sa planong pagtukod og dugang nga mga base militar ug pasilidad sa US, ug batok sa mga *war-games* ug nagkadakung presensyang militar sa US sa nasud. Kini ginasumpay sa internasyunal nga pakigbisog batok sa imperyalismo ug imperyalistang gubat. Adunay makahuluganong ihap ang misalmot sa mga protesta sa pakighiusa sa katawhang Palestino sa pagbatok sa henosidyo sa Zionistang Israel sa Gaza.

Sa kabanikanhan, padayong ginalunsad sa BHB ang rebolusyonaryong armadong pakigbisog sa mga gerilyang nataran sa 14 ka rehiyon sa Luzon, Visayas ug Mindanao. Padayon silang nanglimbasog sa dalan sa rebolusyonaryong armadong pakigbisog, ug determinadong pakyasong ang estratehikong opensiba sa

kaaway. Isip tubag sa panawagan sa Komite Sentral nga "padilaabon ug ipakaylap ang kalayo sa gubat sa katawhan," padayon nga ginapalapad sa BHB ang baseng masa pinaagi sa pagpaaslang ug pagkombina sa gimbuhatong masa ug gimbuhatong militar.

Napataas sa daghang yunit sa BHB ang ilang kapasidad nga ipabilang buta ug bungol ang kaaway, samtang ginahimo ang katilingbanong pakisusi, pagtukod sa mga asosasyong mag-uuma, ug uban pang mga rebolusyonaryong organisasyon, pagtukod sa mga milyang bayan, pagtabang sa masang mag-uuma nga iaslang ang mga antipiyudal nga pakigbisog aron iduso ang pagpaubos sa abang sa yuta, mas ubos nga interes sa pautang, makatarunganong presyo sa mga produkto sa mag-uuma, mas ubos nga presyo sa mga sangkap sa agrikultura, ug uban pa. Padayong ginapatuman sa BHB ang mga tahas niini nga tabangan ang masa sa produksyon, ug ipatuman ang mga kampanyang sa literasi, edukasyon ug kultura. Nagalunsad sila og dinagkou ug ginagmayng taktikal nga opensiba, aron kumpiskahon ang mga armas ug puuhon ang mga yunit sa kaaway, ug aron pakusgon ang kaugalingon isip nag-unang armas sa Partido sa pagbatok sa kaaway

III. Ang mga nakab-ot sa Partido ug kasamtangang kritikal-sa-kaugalingon nga asesment

Ginasaulog sa Partido ang ika-55 nga anibersaryo niini nga puno sa batan-ong kadasig, ug kusog sa hingkod nga manggugubat. Punong lalum nga pagsabot sa makasaysayanong misyon sa proletaryado nga iaslang ang makihut-ong nga pakigbisog hangtud sa komunismo, nagpabiling walay kaka-poy ug kanunay andam ang Partido nga atubangon ang tanang sakripisyo aron iaslang ang nasudnon-demokratikong rebolusyon sa katawhang Pilipino hangtud sa hingpit nga kadaugan, isip pagpangandam sa mosunod nga yugto sa sosyalistang rebolusyon ug konstruksyon.

Ang paghait sa krisis sa semikolonyal ug semipiyudal nga sistema ilalum sa rehimen US-Marcos naghimugso sa hilabihan ka paborab-

leng kundisyon alang sa pagrebolusyon. Alang sa minilyong mamumu-ong Pilipino ug naghagong katawhan nga pipila ka henerasyon nang

nag-antus sa katilingbanong inhumanisya ug tiraniya, ang Partido ug rebolusyon mao ang mirepresenta sa ilang walay kinutubang paglaum alang sa masanag nga kaugmaon. Tinuod gyud nga bisan asaman isabwag, ang mga binhi sa Partido paspas nga misalingsing ug milipang, pamatuud sa dili mahurot nga determinasyon sa lapad nga masa sa mga dinaugdaug ug pinahimuslan nga magrebolusyon.

Nagpabiling lig-on ug solido ang

Partido. Ang pangulohan ug tibuok ginsakpan sa Partido hugot nga nagkahiusa ilalum sa Pulang bandera sa Marxismo-Leninismo-Maoismo, sa Konstitusyon sa Partido ug Programa alang Demokratikong Rebolusyon sa Katawhan niini. Hugot ang panaghiusa sa Partido sa pagpaasdang sa malungtarong gubat sa katawhan subay sa estratehikong linya sa pagliyok sa kasyudaran gikan sa kabanikanhan.

Dagkung mga kadaugan nakabot sa Partido sa milabayng 55 ka tuig sa hugot nga paggunit sa Marxismo-Leninismo-Maoismo ug makugihon nga pagdapat niini sa kongkretong kahimtang sa Pilipinas. Milampus kini sa pagtuki ug pagbutyag sa dunot nga semikolonyal ug semipyudal nga sistema ug sa mga batakaang problema sa imperyalismo, pyudalismo ug burukratakapisismo nga nagpaantus sa katawhang Pilipino. Gitibuok niini ang programa alang sa demokratikong rebolusyon sa katawhan pinaagi sa malungtarong gubat sa katawhan, nga napamatud-ang husto sa padayon nga paggakus niini sa katawhan.

Gitukod sa Partido ang kaugalingon isip usa ka organisasyong pangkadre ug pangmasa. Natukod kini sa pundasyon sa mga Leninistang prinsipyo sa Partidong Bolshevik. Hugot kini nakakonsolida ilalum sa mga prinsipyo sa demokratikong sentralismo. Gilangkuban kini sa napuloan ka libong matitud-anong kadre ug mga manggugubat nga lapad ug lalum nga nakagamot sa dinaugdaug ug pinahimuslang masang mamumuo, mag-uuma, semiproletaryado ug petiburgesya.

Aron pildihon ang nagharing hut-ong ug palagputon ang reaksyunaryong estado, hugot nga gigitnan sa Partido ang duha ka armas sa armadong pakigbisog ug nasudnong nagkahiusang prente. Gina-lunsad sa Partido ang armadong pakigbisog isip nag-unang porma sa pakigbisog nga nagtinguhang tumanon ang nag-unang tahas sa pag-

sakmit sa pulitikanhong gahum. Ang mga ligal nga porma sa pakigbisog sekundaryo apan dili pwedeng buhian sa pagpaasdang sa nasudnon-demokratikong rebolusyon aron pukawon, organisahon ug palihukon ang minilyong katawhan, ug ihmugso ang lapad nga pulitikanhong suporta alang sa armadong pakigbisog. Ginatukod sa Partido ang tago nga dugukan sa kalihukang masa.

Subling gisugdan sa Partido ang rebolusyonaryong armadong pakigbisog pinaagi sa pagtukod sa Bagong Hukbong Bayan niadtong Marso 29, 1969 gikan sa halos wala. Giila niini ang partikular nga mga kinaiya sa pagpaasdang sa gubat sa katawhan sa Pilipinas, uban sa pagkutlo og mga pagtulun-an gikan sa malampusong rebolusyonaryong gubat sa ubang nasud, lakip na gikan sa kaugalingon niining praktikal nga kasinatian sa pagrebolusyon sa usa ka kapupud-an ug bukiron nga nasud.

Nalabwan sa BHB ang mga rebolusyonaryong hukbo sa Katipunan niadtong ulahing bahin sa ika-19 nga siglo ug sa Hukbalahap (1942-1945). Apan gamay ug huyang pagihapon ang BHB kumpara sa daku ug gamhanang AFP nga armado ug gipondohan sa imperyalismong US. Ingonman, determinado ang BHB nga iaslang ang gerilyang pakiggu-bat aron parte-parteng pukanon ang kaaway, hangtud makatigum kini og igong kusog aron moabante gikan sa kasamtangang tunga-tungang yugto sa estratehikong depensiba ngadto sa mosunod nga yugto, ug ngadto sa mosunod pang estratehikong ang-ang hangtud sa hingpit nga kadaugan.

Gitukod sa Partido ang NDFP isip pinakakonsolidadong tago nga nagkahiusang prente sa mga organisasyong gilangkuban sa mga batakaang rebolusyonaryong pwersang nagkahiusa ilalum sa pagpangulo sa Partido, ug nagasuporta sa rebolusyonaryong armadong pakigbisog ug nasudnon-demokratikong rebolusyon. Ang NDFP ang pinaka-ubod

sa tibuok langkub sa nasudnong nagkahiusang prente. Nagatabang kini sa pagtukod sa nasudnong panaghiusa sa katawhang Pilipino batok sa imperyalismo. Hangtud nga maproklama ang demokratikong guberno sa katawhan sa bisperas sa nasudnong kadaugan, pagarepresentahan sa NDFP ang tibuok organo sa pulitikanhong gahum nga ginatukod sa mga sonang gerilyang ug baseng erya.

Mikutlo ang Partido og kusog ug inspirasyon gikan sa nangaging mga kadaugan nga nakab-ot pinaagi sa armadong pakigbisog, rebolusyonaryong kalihukang masa, ug nagkahiusang prente. Dungan niini, mapahiubsanon kining nakakat-on sa milabayng mga kasaypanan ug kakulangan, nagapatuman sa pagsaway ug pagsaway sa kaugalingon, ug nagatul-id isip pamaagi aron ipabilin ang kamatanud-anon sa Marxismo-Leninismo-Maoismo. Ang subling pagtukod mismo sa Partido niadtong 1968 positibong gibunga sa kalihukang pagtul-id batok sa rebisyunismong Lava ug gangsterismong Taruc-Sumulong. Niadtong 1992, gilunsad sa Partido ang Ika-duhang Bantugang Kalihukang Pagtul-id aron ibalik kini sa hustong linya sa Marxismo-Leninismo-Maoismo sa pagtul-id sa modernong rebisyunismo ug sa sayop nga linya sa insureksyunismo ug adben-turismong militar nga grabeng nakadaut sa katawhan ug sa ilang rebolusyon.

Samtang ginasaulog nato ang atong mga nakab-ot, matngon kita sa mga kasaypanan, kahuyangan ug kakulangan sa natad sa ideolohiya, pulitika ug organisasyon nga pipila ka tuig nang nagatunhay. Kinahanglan nato kining ilhon aron hugot nato kining matul-id ug aron maibot ang suhetibistang mga gamot niini.

Sukad nga nanawagan kita niadtong milabayng tuig nga konsolidahon ug dugang pakusgon ang Partido ug kumprehensibong iaslang ang demokratikong rebolusyon

sa katawhan, ang mga nangulong komite sa Partido ug mga kadre naglunsad og mga rebolusyonaryong pagtuon, pag-ases, mga pagsumada ug pagsaway sa kaugalingon, aron puntingon, tul-iron ug patigbabawan ang lain-laing porma sa suhetibismo, Too ug "Wala" nga kasaypanan, ug oportunistang tendensiya.

Napunting sa mga pagtuon ug diskusyon ang ubos nga ang-ang sa kahimatngong teoretikal ug kahuyangan sa ideolohiya sa daghan sa atong nangulo ug nahaubos nga komite nga nagkinaia sa luag nga paggunit sa proletaryong rebolusyonaryong teorya, sa kinatibuk-an, ug sa partikular, sa teorya sa rebolusyong Pilipino, sa mga balaod sa paglambo niini, ug sa praktikal nga aplikasyon niini sa kongkretong kahimtang sa langkub sa ilang mga gimbuhaton.

Naigo sa suhetibismo ang dakung bahin sa Partido nga nagtugot sa mga burges ug petiburges nga panglantaw ug mentalidad nga mituhop ug mikuyanap sa lain-laing ang-ang sa liderato sa Partido, nga nagresulta sa lain-laing Too ug "Walang" kasaypanan ug tendensiya sa pulitika, ug burukratismo ug ultrademokrasya sa organisasyon. Ang empirismo ug dogmatismo mao ang mga suhetibistang kasaypanan nga mitumaw gikan sa pakayas nga hustong ikombina ang teorya ug praktika nga misangpot sa sayop nga mga ideya ug praktika. Ang empirismo mao ang praktika nga walay teorya, nga miulpot sa buta nga pagrebolusyon; samtang ang dogmatismo mao ang teoryang himulag sa praktika, nga miulpot sa pagsermon nga walay rebolusyon. Ang empirismo ang nag-unang suhetibistang kasaypanan sa Partido nga nagresulta nag-una sa mga Toong kasaypanan ug tendensiya.

Adunay lapad nga pagkakampante sa pagtuon ug pagdapat sa rebolusyonaryong teorya aron magsilbing giya sa praktika, ug kulang sa paningkamot sa pagkutlo og

teorya gikan sa praktika. Kung walay hugot nga paghupot sa Marxis-ta-Leninista-Maoistang teorya aron giyahan ang atong praktika, ug kung walay pagkutlo sa teorya gikan sa praktika, dili moabante ang rebolusyonaryong praktika ngadto sa mas taas nga ang-ang ug mungot ug moatras sa mas ubos nga ang-ang. Labaw pang mograbe ang ingon niining sitwasyong sa petiburges nga pagpakontento sa karang kahibalo, mga pamaagi, praktika ug plano, o katapulan nga magtuon ug magsumada sa kasinatian. Misangpot kini sa kapakyasan sa pagpalambo sa teorya ug sa pagsagop sa bag-ong mga pamaagi ug plano nga haum sa nausab nga kundisyon, ug sa kinatibuk-ang kapakyasan sa pagpataas sa praktika sa mas taas nga ang-ang.

Sa gimbuhaton sa ideolohiya, nakita nato ang problema sa dili sustenidong paningkamot sa gimbuhatong edukasyon, bisan sa kadaugang nakab-ot sa paglunsad sa Abanteng Kurso sa Partido gikan 2017. Daghang kadre sa mga nangulong posisyon ang kulang sa paningkamot nga magbasa ug magtuon sa mga klasikong Marxis-ta-Leninista-Maoistang sinulat ug mga dokumento sa Partido aron magsilbing reperensya sa pagsulbad sa mga praktikal nga problema. Adunay pipila ka kadre sa Partido nga nagpakontento sa kaugalingon ug nanghinambog sa kanhing mga kahibalo ug kulang sa mapahiubsanong paningkamot nga ipataas ang ilang kahibalong teoretikal ug sa paggamit sa teorya aron sumadahon ang ilang kasinatian ug rebolusyonaryong praktika sa lain-laing ang-ang ug natad sa gimbuhaton.

Aduna usay kakulangan sa sistematikong paningkamot nga ipatuman ang katilingbanong pakisusi ug pagtuki sa hut-ong aron ipabiling tukma ang atong mga pagtuki ug palisiya sa makanunayong pag-usab sa obhetibong kundisyon. Kulang ang plano o paningkamot sa mga responsableng nangulong komite sa

panukiduki o pagsuho og mga sarbey aron tigumon ang impormasyon ug mokutlo og teorya gikan sa kahibalong perseptwal mahitungod sa mga kundisyon nga langkub sa ilang gimbuhaton, nga sa pipila ka higayon misangpot sa mabaw nga pagtuki sa mga isyu, o kulang sa hugot nga pagsabot sa kongkretong kundisyon sa masa ug sa mga yaweng isyu ug hisgutanan alang sa pagpu-kaw, pag-organisa ug pagpalihok kanila.

Kung walay hugot nga paghupot sa diyalektikal ug istorikal nga materyalistang panglantaw ug pamaagi, ang mga kaubang naigo sa empirismo adunay tendensiyang makita lamang ang mga butang nga anaa sa ilang atubangan, ug dili makita ang proseso sa paglambo. Sa panahon sa kadaugan ug pag-abante, nahimong kampante ug hambog sila, ug napakyas nga makita ang dalan aron labaw pang iasdag ang rebolusyonaryong praktika aron kab-oton ang mas dagkung kadaugan, nga misangpot sa pag-ungot ug mga pag-atras. Sa panahon sa kalisdanan ug mga kapakyasan, nagpalunod sila sa mga problema ug nawad-ag kadasig, ug midalin-as ngadto sa pesimismo ug pasibidad. Daghan ang pakyas nga patigbabawan ang ilang kahadlok sa sakripisyo ug sagad nabira sa ilang pangandoy alang sa sayon ug komportableng kinabuhi, ug mitaliwan atubangan sa kalisdanan.

Ang pagpaling gikan sa pagkahambog ug pagkakampante, ngadto sa pesimismo ug pasibidad, kahadlok ug pagtaliwan tatak sa panghuhunang burges ug petiburges o hatungang mag-uuma nga hingpit nga sukwahi sa proletaryong kakugi, kaligdong, kamaunungon, militansiya, optimismo ug kaisog.

Gikutkut sa taya sa petiburges nga mentalidad ang daghang bahin sa atong rebolusyonaryong makina, hinungdan sa dili maayong dagan niini. Gani, pipila na ka gubang pyesa ang nahulog atubangan sa dakung kalisdanan sa pagbatok sa

estrategikong opensiba sa kaaway sa milabayng lima ka tuig. Sama sa unsamang makina, kinahanglan natong bakkakon ang taya ug pulihan ang mga nagubang parte og bagong mga pyesa, aron makabwelo ug paspas nga makaabante ang rebolusyon.

Sa milabayng mga tuig, ang suhetibismo miresulta, nag-una, sa mga Too, ug sekundaryo, sa mga "Walang" kasaypanan, kakulangan, kahuyangan ug mga tendensiya, sa tanang natad sa rebolusyonaryong gimbuhaton.

Makita nato ang kaylap nga mga problema sa natad sa rebolusyonaryong armadong pakigbisog bunga sa suhetibismo sa ideolohiya. Sa kapakyas nga huptan ang dalan sa paglambo sa gubat sa katawhan, partikular gikan sa unang yugto ngadto sa tunga-tungang yugto, ug gikan sa tunga-tunga ngadto sa mosunod nga yugto, dili pipila lang ka gerilyang nataran sa BHB ang miuk-uk ug miungot sa dugay nga panahon sa karaang ang-ang. Adunay mga lider sa Partido nga nagsalig na lamang sa kanhi nilang ang-ang sa kasinatian ug dili tin-aw nga nakita ang dalan para sa makaunayong iasadang nga pabalud-balod ang rebolusyon, o gikan sa usa ka ang-ang ngadto sa mosunod nga ang-ang, sa panginahanglang abton ang tibuok langkub sa mga gerilyang nataran, gikan sa bukiron, ngadto sa mga buntod, patag, daplin sa suba ug dagat, ug mga sentrong lungsod.

Gipasigpit nila ang langkub sa BHB sa masaligan niining mga baseng gerilya ug mga kota sa bukid, ug gilimitahan ang sakop ug langkub sa inisyatibang militar ug pulitika sa Partido ug BHB. Ang pagpig-ot sa kaugalingon sukwahi sa panginahanglan sa mga yunit gerilya nga makanunayong molihok ug moabante, ug kanunay magpabiling anaa sa opensibo. Ang masaligang mga baseng gerilya gihimong daw "paborito" o "comfort zone" nga mga baryo, komunidad o kampo sa

bukid nga duul sa suportang masa, linya sa suplay ug pasilidad sa komunikasyon.

Ang pagpig-ot sa kaugalingon ug pagkawala sa inisyatiba misangpot sa konserbatismong militar, human nga nalimitahan o dili na maa-bot ang mga lugar gikan asa pwedeng mobira ang BHB sa kaaway. Mitumaw ang uban pang mga problema sa pagkalap og impormasyong paniktik, tinubdan sa suplay, komunikasyon, ug uban pa. Dili daling makalunsad og ambus ang BHB sa haywey tungod kay ang primaryang pwersa niini nakakampo sa interyor. Nahimong langan ug mikaon og dakung oras ang paglunsad og mga reyds, ambus o uban pang mga bata-kang taktikal nga opensiba. Nagpaigna lamang sa mga atritibong taktikal nga opensiba (harasment, pagsilot, ug uban pa) ug wala sa plano ang panginahanglang sustenidong maglunsad og mga anihilatibo o bata-kang taktikal nga opensiba isip prinsipal nga bahin sa atong estratehiya nga hinay-hinay nga pahuyangon ang kaaway ug inang-ang nga pakusgon ang hukbong bayan.

Sa makahuluganong ihap sa mga gerilyang nataran nga may kusog-kumpanya o adunay daghang platung pwersa, nagpaigo ug nagpakakampante ang pipila ka lider sa Partido. Adunay mga kaso sa sobrang konsentrasyon sa pwersa sa pipila ka rehiyon o subrehiyon, kung asa duha o labaw pang mga pwersang gerilya ang gitapok sa mga kampo sa kabukiran nga milungtad og pipila ka bulan, aron ipatuman ang mga pagbansay, pagtuon, tagdugay nga pulong o aron maghulat sa dili maayong naplano nga opensiba, kung asa pipila ka pwersa ug gamay nga panahon na lang ang nahabilin alang sa gimbuhatong masa. Ang maong dinugay nga pagkampo nahimong bug-at para sa organisadong masa ug mga pwersang milisya nga kinahanglang dobleng maningkamot aron padayon ang pagdaloy sa suplay. Nagresulta

usab kini sa pagluag sa disiplinang gerilya ug "sibilyanisasyon" sa mga pwersang gerilya. Adunay pipila ka yunit sa BHB nga nag-atubang sa problema sa pag-inum-inom sa pipila ka mga gerilyang manggugubat.

Sa yugto sa pag-abante sa armadong pakigbisog, kadtong adunay suhetibistang kasaypanan adunay tendensiyang pakaminusan ang kapasidad sa kaaway ug nakita lamang ang ilang mga taktikal nga kadaugan. Nawala sa ilang panghuna-huna nga anaa pa sa estrategikong opensiba ang kaaway, nagpabiling superyor sa estrategikong ang-ang, ug ginapataas ang kapasidad nga ipatuman ang intelidyens ug magplano sa mga kampanya sa estrategikong opensiba. Adunay kapakyasan sa panghunahuna nga walay pagbahin sa usa ngadto sa duha—gagakita lamang ang positibo, ug dili ang negatibo, ginasaolog ang kadaugan apan wala nangan-dam sa mas dagkung pakigbisog. Nagluag ang ilang paggunit sa batakang mga prinsipyo sa operasyong gerilya sa konsentrasyon, dispersal ug pagbalhin-balhin, nga misangpot sa mga problema sa tagdugay nga sobrang konsentrasyon sa mga bertikal nga yunit gerilya ug sobrasobrang dispersal sa mga horisontal nga yunit panggimbuhatong masa, ug kakulangan sa sekretong paglihok ug maniobra, sama sa paglihok sa adlawng daku sa mga bantang nga lugar, nga naghatag sa kaaway sa tin-aw nga bintaha alang sa sarbeylans ug pagmonitor. Dili lamang pipila ang nahimong hambog ug arogante, ug ang uban nahimong militarista ug mangtas (gahig-ulo), dili lang sa pag-atubang sa kaaway, mas grabe pa, sa pag-atubang sa masa.

Sa daghang bahin sa nasud, napakyas ang mga komite sa Partido ug kumand sa BHB nga ipabilin ang hugot nga paggunit sa tahas nga iasadang ang rebolusyong agraryo isip yawe sa pagpalihok sa masa, pagtukod sa baseng masa ug pagpundar sa mga organo sa pulitikan-

hong gahum. Niining mga lugara, napakyas kitang ipatuman ang kru-syal nga tahas sa katilingbanong pakisusi ug pagtuki sa hut-ong aron matibuok ang plano alang sa pag-hugpong sa masa ug pagpanguna sa ilang mga pakigbisog. Adunay pipila ka mga yunit nga nahimong bug-at ang mga tiil ug pakyas sa pakigsan-durot sa masa sa ilang mga baryo aron maglunsad og pulitikanhong gimbuhaton. Adunay pipila ka mga kadre sa Partido nga nagpaigo sa "pag-text" sa mga lokal nga sanga sa Partido imbes makigtigum kanila.

Ulahi nang naamguhan sa pipila ka komite nga ang baseng masa dili matukod ug makokonsolida sa pag-salig lamang sa pipila ka tradisyunal nga lider sa baryo o sa simpleng paghatag sa masa og materyal nga serbisyo nga walay pagpataas sa ilang makihut-ong nga kahimat-ngon, pagtukod ug pagpakusog sa ilang mga organisasyong masa, ug pagpataas sa ilang militansya pi-naagi sa mga pakigbisog sa agrar-yong rebolusyon. Gipahimuslan sa kaaway ang huyang nga pundasyon sa baseng masa pinaagi sa pagga-mit sa bangis nga terorismo batok sa masa ug pagpanglinla sa kataw-han sa mga saad sa dagkung kanti-dad sa salapi sa pagsulay nga ibulag ang masa sa ilang mga rebolusyo-naryong manggugubat, ug tali sa mga lider sa baryo o kaliwatan. Tu-ngod kay walay kolektibong pagsu-kol, ginailog karon sa mga pasista ang ilang yuta ug ginahatag kini sa mga langyawng minahan ug mga plantasyon.

Sa panahon sa pag-atras, kad-tong adunay suhetibistang kasay-panan may tendensiya sa sobrang pagtansya sa kusog ug gidak-on sa kaaway. Nawala ang ilang diyalekti-kal nga pamarog aron magpakunot og agtang, makugihon nga mag-ob-serba ug ilhon ang mga pwersa, tu-mong, ug mga plano sa kaaway ug diskubrehon ang mga huyang nga punto niini, ug planuhon ang mga pamaagi aron tungaon ang mga pwersa sa kaaway ug mag-abli og

mga oportunidad aron ig-on ang mga nakabulag o nakalayo nga yu-nit niini. Nagpatigbabaw kanila ang burgis nga kahadlok. Kapakyasan usab kini sa gambalay sa panghu-nahuna. Misangpot sila sa pagsibat. Ang depensa nahimong makausa-ka-bahin nga pag-atras ug pulos pasibong depensa, sa porma sa pag-atras sa gihanduraw nga kota sa bukid ug dili planadong pagbal-hin sa bag-ong mga erya nga walay suportang masa. Mas grabe pa, gia-bandona nila ang baseng masa ug gibiyaan silang walay kapasidad nga manalipud ug walay planong mosukol. Sa ingon niini, gibulag nila ang ilang mga kaugalingon ug mi-sangpot sa lunlun-militaristang ka-himtang nga pabor sa plano sa kaa-way.

Sa milabayng mga tuig, ang maong mga kasaypanan ug kakula-ngan miresulta sa kapakyasan sa daghang yunit sa BHB nga malahu-tayon ug pabalud-balod nga palap-don ang mga gerilyang nataran su-bay sa linya sa kaylap ug subsub nga gerilyang pakiggubat subay sa nagkalapad ug nagkalalum nga ba-seng masa. Ang problema sa pagpa-sigpit sa kaugalingon ug ang kapak-yas nga makanunayong palapdon ug patas-on ang ang-ang sa rebolu-syonaryong praktika, misangpot sa kawalay-kapasidad sa BHB nga pugson ang kaaway nga inaton ang pwersa, ug gipasagdan na hinuon ang kaaway nga maglunsad og mga kampanya sa *gradual constriction* (inanay nga pagliyuk) ug mga *focused military operation*. Gibutang niini ang mga pwersang gerilya sa sitwasyong lunlun-militar ug pasibi-bong militar, nga bulag sa puliti-kanhong suporta sa baseng masa niini, samtang ang baseng masa gi-napailalum sa brutal nga armadong pagpanumpo. Adunay mga substan-tibong kapakyasan nga nasinati sa BHB ug sa rebolusyonaryong masa tungod sa maong mga internal nga kasaypanan.

Samtang husto alang sa mga nangulong komite nga hatagag

prinsipal nga atensyon ang tahas sa paglunsad sa armadong pakigbisog isip nag-unang porma sa pakigbi-sog, atong makita ang kasaypanan sa pipila ka rehiyunal nga komite sa Partido nga pasagdan ug pakyas nga epektibong pangulohan ang re-bolusyonaryong kalihukang masa pareho sa kasyudaran ug kabani-kanhan. Sa daghang kaso, masala-min kini sa paglimita sa istruktura, kusog ug mga operasyon sa Partido sa istruktura sa kumand ug langkub sa BHB, maong nalimitahan ang ini-syatiba sa Partido sa gambalay sa BHB. Ang maong kasaypanan gisa-way na niadto pang 2015 apan nag-padayon sa daghang rehiyon.

Sa natad sa rebolusyonaryong kalihukang masa, nakita nato ang nag-unang mga Toong oportunis-tang tendensiya sa konserbatismo, ikogismo, ligalismo, ekonomismo, repormismo ug NGOismo. Makita ang mga problema sa diyalektikal nga pagkumbina sa mga ligal ug iligal nga porma sa pakigbisog, ug ang tendensiya nga ibutang ang tanang itlog sa ligal nga bukag (*basket*), kung asa primarya o ekslusibong gi-napadagan ang gimbuhaton sa puli-tika sa ligal nga porma samtang gi-napadaplin ang pagpalambo sa re-bolusyonaryong gimbuhatong tago. Mapansin ang tendensiya sa usa-ka-bahin nga paghatag-duut sa pa-kigbisog alang sa reporma ilalum sa nagharing reaksyunaryong gubyer-no, samtang napasagdan ang tahas nga ibutyag ang makihut-ong nga kinaiya sa nagharing estado, kumprehensibong pagpalambo sa kalihukang tago sa mga syudad ug sa kabanikanhan, ug ang pagsum-pay ug pagsuporta sa rebolusyonar-yong armadong pakigbisog isip nag-unang porma sa pakigbisog. Ki-ni misangpot sa pag-ila sa mga ak-syong masa isip kabahin sa gitawag og burges nga "pressure politics," imbes nga magsilbi kini isip pamaagi sa pagpadayag sa kolektibong kasi-lag sa masa batok sa anti-kataw-hang palisiya sa reaksyunaryong es-tado, ug isip mga hinagiban nga pa-

haiton ug huptan sa masa alang sa ilang militanteng pulitikanhong pakigbisog, kadungan sa rebolusyonaryong armadong pakigbisog. Nakahimo kini og kontra-epekto sa pagpahuyang sa demokratikong kalihukang masa.

Makita nato ang tendensiyang magtuki o motubag sa mga isyu gikan sa sigpit nga petiburgesya nga panglantaw ug sayop nga pagtagad niini isip interes sa hut-ong mamumu. Sa pipila ka mga higayon, ginalunsad ang mga aksyong masa sa gambalay sa limitasyon sa mga hatungang hut-ong nga adunay tendensiyang birahon paubos ang ang-ang sa militansya sa katawhan.

Mas grabe, adunay tendensiya ang mga pwersang ligal demokrati-ko nga hilabihang gihimulag ang ilang mga kaugalingon sa armadong pakigbisog isip tubag sa propaganda sa kaaway, imbes nga iduso ang pagkamakatarunganon sa paglunsad sa armadong pagsukol batok sa tiranya. Aduna kini epekto sa pagpahuyang sa pulitikanhong suporta alang sa rebolusyonaryong armadong pakigbisog.

Aduna usay Toong oportunidadang tendensiya sa konserbatismo sa hisgutanan sa pagpalambo sa suporta sa nagkahiusang prente sa armadong pakigbisog. Kulang o wala ginahatagan og pagtagad ang pagpakusog sa mga tago nga sektoral nga organisasyong masa. Dili lagsik, sistematiko ug sustenido ang pagpalihok sa mga kadre, aktibista ug suportang materyal gikan sa han-ay sa mga petiburgesyang intelektwal ug propesyunal alang sa Bagong Hukbong Bayan. Kulang ang paningkamot nga magtukod og mga alyansa sa nasudnong burgesya aron moani og suporta alang sa rebolusyonaryong armadong pakigbisog.

Sa natad sa organisasyon, misangpot sa liberalismo, ultra-demokrasya ug burukratismo ang empirisistang suhetibismo. Nagresulta kini sa paghuyang sa mga sistemang komite ug kolektibong pagpangulo.

Daghang kaso kung asa ang

mga kagawad sa kalihiman o natunhay nga komite bulag-bulag ug walay komunikasyon, ug dili kolektibong makadesisyon sa hinanali nga mga hisgutanan, maong nabiyaan sa kalihim ang pagdesisyon. Adunay mga kaso nga ang mga kadre sa komiteng nataran dugay nga mibulag sa platun, ug nagpagawas og mga mando nga walay kolektibong desisyon.

Kulang sa militansya ug propesyunalismo sa mga pamaagi sa pagtrabaho sa han-ay sa pipila ka kadre sa Partido. Milungtad ang mga tigum tungod sa kakulang sa pagpangandam, o tungod sa dili resolbadong mga panagbangi sulod sa mga komite. Ang nahaubos nga mga komite pakyas sa regular nga pagsumite og mga report sa ilang nahataas nga komite, samtang ang nangulong mga komite pakyas sa pagpagawas og mga napanahong mga instruksyon ug palisiya, nga nagresulta sa kawalay panaghiusa ug koordinasyon tali sa lain-laing mga organo. Adunay mga komiteng wala nakapatuman sa regular o espesyal nga tigum ug kumperensya sa gimbuhaton aron mokutlo og mga pagtulun-an gikan sa kasinatian ug magtibuok og mga palisiya. Kining tanan manipestasyon sa empirisismo sa natad sa organisasyon.

Kinahanglan natong hatagan og espesyal nga atensyon ang problema sa burukratisasyon sa han-ay sa nangulong mga komite sa Partido sa kalihukang masa sa kasyudaran. Daghan ang nahikot sa ilang mga upisina ug bulag sa lapad nga masa, ug dili makugihong nagasalmot sa gimbuhatong masa sa mga pabrika ug komunidad, o kulang sa kadasig. Adunay tendensiya sa liberalismo sa han-ay sa mga yaweng kadre sa Partido ug mga pultaym nga organisador nga mahimong "sibilyanisado" ug "domesticated" (nahikot sa mga hisgutanan sa balay), o naigo sa panghunahunang "empleyado" (9-5 oras sa upisina). Sa pipila ka bahin sa organisasyon, ang mga lagda sa disiplina sa Partido dayag

nga ginalapas. Ang mga hisgutanan nga nagakutkut sa maong mga palisiya wala mahukmanong nasulbad ug gipasagdan pa hinuon.

Pakyas ang pipila ka yaweng kadre sa Partido nga magpalambo sa sistema sa tago nga operasyon aron ipabiling bungol ug buta ang kaaway. Gipasagdan nilang mahimo silang vulnerable sa pasubli-subli nga atake ug paglukong sa kaaway. Suhetibista ang paghandum nilang luwas sila sa sarbeylans sa kaaway sa simpleng basihan nga nakita nila sa ilang atubangan, bisan og wala sila miputol og linya sa ilang mga "fixed points" o pirming mga ginakontak. Pakyas silang makita ang koneksyon sa mga insidente sa seguridad ug ginaila kini isip himulag nga mga kaso, pakyas nga sabton ang laraw sa kaaway ug ang malahutayong plano niining sistematikong bungkagon ang tago nga kutay sa Partido.

Gihikyad nato sa taas ang pipila sa mga yaweng problema sa ideolohiya, pulitika ug organisasyon nga napunting sa nangulong mga komite sa Partido sa ilang langkub sa gimbuhaton. Ang mga kadre ug komite sa Partido kasamtangang nagakonsolida aron patigbabawan ang lain-laing porma sa suhetibismo ug sa dugay nang nagtunhay nga Toong kasaypanan, tendensiya, o mga kakulangan, aron pakusgon ang rebolusyonaryong mga pwersa ug ias-dang ang rebolusyon nga may mas dakung kalagsik.

Padayon natong ginapakusog ang kolektibong pagpangulo sa Komite Sentral, kaabag ang mga anaa sa ikaduha ug ikatulong han-ay sa liderato, aron pangulohan ang makanunayong paglambo sa rebolusyonaryong mga pwersa sa nasud. Ang pagpanaw ni Ka Joma ug pagkamatay sa pipila natong mga yaweng lider daku kaayong kawad-on sa sentral nga liderato sa Partido. Ingonman, hingpit nga matngon ang Partido nga gitukod kini nga adunay bantugang tahas nga pangulohan ang demokratikong rebolusyon sa katawhang Pilipino ug ang sosyalis-

tang rebolusyon sa umalabot, bu-tang nga labaw sa kinabuhi sa kinsa-man, ug labaw pa sa kapasidad nga mahimo sa pipila lamang ka tawo.

Sa kasamtangan, miako sa dag-kung mga responsibilidad ang ba-tan-ong mga kadre sa Partido sa tanang ang-ang, ug gisabwag sila sa lain-laing natad sa rebolusyonar-yong gimbuhaton nga puno sa ka-dasig ug kalagsik. Ginapakusog nato

karon ang pagtinabangay sa mga beterano ug batan-ong mga kadre ug manggugubat aron pangulohan ang Partido, ang BHB ug ang ka-tawhang Pilipino ngadto sa mas taas nga ang-ang sa armado ug uban pang porma sa pagsukol.

Andam ang mga nangulong kad-re ug komite nga militanteng atuba-ngon ang hagit nga dugang pakus-gon ang Partido sa ideolohiya, puli-

tika ug organisasyon. Labaw ka-nus-aman, determinado ang Partido nga iasdad ang Marxismo-Leninis-mo-Maoismo ug ang mga tinudlo ni Ka Joma, palig-onon ang pagpangu-lo sa Komite Sentral, tul-iron ang tanang kasaypanan ug kakulangon, patigbabawan ang tanang mga ba-bag ug iasdad ang demokratikong rebolusyon sa katawhan hangtud sa kadaugan.

IV. Hinanali ug kritikal nga mga tahas sa pagpakusog sa Partido ug pagpaasdad sa demokratikong rebolusyon sa katawhan

Taliwala sa nagkagrabeng krisis sa semikolonyal ug semipyudal nga siste-ma ilalum sa rehimeng US-Marcos ug sa paspas nga paggrabe sa kahim-tang sa katawhang Pilipino, hinanaling kinahanglang himuon sa tibuok Partido ang tanang paningkamot para pukawon, organisahon ug palihukon ang lapad nga masa sa katawhang Pilipino alang sa rebolusyonaryong paglihok. Kini pagsakmit sa paborableng mga kundisyon aron kumprehensibo ug kusganong iasdad ang bag-ong tipo sa demokratikong rebolusyon sa katawhan.

Subay sa maong kinatibuk-ang tumong, kinahanglan natong tibuok bahin nga palig-onon ang Partido isip abanteng destakamento sa pro-letaryadong Pilipino ug nangulo sa demokratikong rebolusyon sa ka-tawhan, pakusgon ang Bagong Huk-bong Bayan ug iasdad ang rebolu-syonaryong armadong pakigbisog, iabante ang rebolusyonaryong kali-hukang masa pareho sa kasyudaran ug kabanikanhan, dugang palapdon ug pakusgon ang nagkahiusang prente, ug pangulohan ang masang Pilipino sa anti-pasista, anti-imper-yalista ug anti-pyudal nga mga pa-kigbisog batok sa rehimeng US-Marcos.

Ilunsad ang kalihukang pagtul-id aron pakusgon ang Partido

Sa maong mga tahas, ang labing mahinungdanon ug hinanali mao ang dugang pagpakusog sa Partido. Aron mahimo kini, nanawagan ang Komite Sentral sa tanang mga kadre ug komite sa Partido, nga mahuk-manon ug madasigong iasdad ang usa ka kumprehensibong kalihukang pagtul-id alang sa krusyal nga pa-kigbisog aron isalikway ang maka-daut nga mga epekto ug impluwen-

sya sa lain-laing lama sa burgis ug petiburgis nga suhetibismo nga nag-paluya sa Partido ug nagresulta sa grabeng mga pag-atras sa rebolu-syonaryong kalihukan sa milabayng pipila ka tuig. Bugtong sa paglunsad og kalihukang pagtul-id atong ma-patigbabawan ang atong mga pag-atras ug kapildihan, subling mapa-pasas ang paglambo sa Partido, ug lig-ong mapaasdad ang mga gim-buhaton sa tanang natad sa rebolu-syonaryong paningkamot.

Pagatumanon sa liderato ug ti-buok ginsakpan sa Partido ang maong kalihukang pagtul-id nga hu-got nga nagkahiusa ilalum sa giya sa Marxismo-Leninismo-Maoismo, ingonman subay sa linya ug pagtuki sa Partido sa katilingbang Pilipino, ug programa alang sa pagpaasdad sa demokratikong rebolusyon sa ka-tawhan pinaagi sa malungtarong gubat sa katawhan subay sa estra-tehikong linya sa pagliyak sa kasyu-daran gikan sa kabanikanhan. Sa paglunsad sa kalihukang pagtul-id, tumong natong palalumon ang atong pagsabot ug pahugton ang atong paghupot sa Marxismo-Leni-nismo-Maoismo ug sa linya ug prog-rama sa Partido nga adunay estra-

tehikong panglantaw sa dugang pagpataas sa ang-ang sa atong re-bolusyonaryong praktika subay sa atong nakab-ot nga mga kadaugan ug nasumadang mga kasinatian.

Ang kalihukang pagtul-id, nag-una, usa ka kalihukan aron tun-an ug subling palig-onon ang atong pagsubay sa Marxismo-Leninismo-Maoismo ug sa bataakang mga prin-sipyo, linya, konstitusyon ug prog-rama sa Partido, aron sumadahon ang nangaging mga kasinatian ug aron magsaway ug magsaway-sa-kaugalingon. Ang nag-unang tu-mong mao ang pagpataas sa atong kahibalo ug pagpalig-on sa atong pagsabot sa Marxismo-Leninismo-Maoismo ug sa mga prinsipyo ug lin-ya sa Partido pinaagi sa paglambigit niini sa atong rebolusyonaryong praktika sa milabayng pipila ka tuig ug kritikal-sa-kaugalingon nga ase-son ang atong gimbuhaton ug ang atong mga kadre, aron kalitatibong patas-on ug pahaiton ang atong mi-litanteng estilo sa pagtrabaho.

Sa pagpatuman sa kalihukang pagtul-id, tumong natong atuba-ngon ug sulbaron ang dugay nang nagatunhay nga mga kahuyangan ug kasaypanan sa pagtukod sa Par-tido, sa paglunsad og rebolusyonar-yong armadong pakigbisog subay sa linya sa kaylap ug subsub nga geril-yang pakiggubat subay sa nagkala-pad ug nagkalalum nga baseng ma-sa, ug sa pagpaasdad sa rebolu-syonaryong kalihukang masa sa ka-syudaran ug kabanikanhan.

Ang desisyon nga ilunsad ang usa ka kalihukang pagtul-id gisundan sa mga paningkamot sa lain-lain komite sa rehiyon sa Partido ug ubang nangulong mga komite sa milabayng usa o duha ka tuig sa pagtul-id sa nangaging mga kasaypanan ug kahuyangan nga mibabag ug mipugong sa ilang pag-uswag. Tumong sa kalihukang pagtul-id nga konsolidahon ug patas-on ang maong mga paningkamot sa angang sa tibuok Partido, gikan sa sentrong liderato hangtud sa tanang nangulong komite ug sanga sa Partido sa Luzon, Visayas ug Mindanao ug sa gawas sa nasud.

Kahinumduman nga niadtong tunga-tunga sa 2016, gipanawagan sa Kawanihan sa Pulitika sa tanang mga pwersa sa Partido nga tul-iron ang kritikal nga mga hisgutanan sa ideolohiya, pulitika ug organisasyon. Tubag kini sa inanay nga pagkunuhod sa milabayng mga tuig sa hisgutanan sa rebolusyonaryong kalihukang masa ug sa rebolusyonaryong armadong pakigbisog. Dugang nga giduso ang maong panawagan sa pagpahigayon sa ika-2 nga Kongreso niadtong tuiga.

Kini adunay diha-dihang epekto sa pag-usab sa negatibong dagan. Nakita gilayon ang makahuluganong pag-uswag sa armadong pakigbisog ug pagtukod sa baseng masa gikan 2017 hangtud 2019. Apan, napakyas kita nga mahukmanon ug determinadong ilunsad ang kalihukang pagtul-id. Wala nasustine ang inisyal nga mga kadaugan samtang ang mga bata kang problema mitumaw atubangan sa gipakusog nga kontra-rebolusyonaryong gubat ug brutal nga pagpanumpo sa kaaway.

Sa milabayng (una ug ikaduhang) kalihukang pagtul-id, giatubang sa Partido ug gibatukan ang sistematikong paningkamot sa pipila ka rebisyunistang traydor nga mikutkut sa bata kang mga prinsipyo sa Marxismo-Leninismo-Maoismo, ug giatake ang pagtuki sa Partido sa semikolonyal ug semipyudal nga sistema, ug ang linya niini sa demokratikong rebolusyon sa katawhan pinaagi sa malungtarong gubat sa katawhan, ang estratehiya niini

sa pagliyak sa kasyudaran gikan sa kabanikanhan, ug ang anti-rebisyunistang linya niini.

Ginabatukan nato karon ang kaylap nga empirismo ug ang lainlaing lama sa burgis ug petiburgis nga suhetibismo nga nagasangpot sa Too ug "Walang" oportunistang tendensiya. Aron ilunsad ang maong pakigbisog, kinahanglan natong ilunsad sa militanteng pamaagi ang atong kalihukang pagtuon. Ang pagkamilitante mao ang pagka kritikal-sa-kaugalingon sa pagtuon, pag-ases ug pagsumada sa atong nangaging mga rebolusyonaryong praktika, aron mailhan ug masalikway ang mga kasaypanan ug kahuyangan nga bisan og dili lutaw kaayo apan makadaut, makapaluya ug makapauok, sama sa dayag nga rebisyunismo.

Tumong sa kalihukang pagtul-id nga hatagan og konsentradong porma ang nagtunhay nga panagbangi sulod sa Partido tali sa proletaryadong rebolusyonaryong linya ug sa burgis ug petiburgis nga linya ug moda sa panghunahuna. Kinahanglan natong ipataas ang kapasidad sa mga kadre sa Partido sa paggamit sa diyalektikal ug istorikong materyalismo aron kusganong ibutyag ug batukan ang burgis ug petiburgis nga mga ideya nga mipauk-ok sa Partido, isalikway ang suhetibismo, ug tul-iron ug patigbabawan ang dugay nang nagatunhay nga mga kasaypanan ug kahuyangan sama sa konserbatismo, ikogismo, kumandismo, liberalismo, ultrademokrasya ug burukratismo. Kinahanglan natong tul-iron ang tanang petiburges nga bagahe, patigbabawan ang pesimismo, palalumon ang atong pagsalig sa Partido ug sa masa, andamon ang atong mga kaugalingon alang sa tanang gikinahanglang sakripisyo ug maningkamot nga kab-oton ang mas dagkung mga kadaugan kaysa kaniadto.

Ang kalihukang pagtul-id adunay pipila ka bahin:

a) Usa ka kampanya sa pagtuon aron bug-os nga tun-an ug tun-an balik ang bata kang mga prinsipyo sa Marxismo-Leninismo-Maoismo gamit ang Praymer sa Marxismo-Leni-

nismo-Maoismo ni Ka Joma ug tun-an balik ang mga klasikong sinulat sa mga bantugang lider komunistapinaagi sa kolektibong mga diskusyon ug indibidwal nga pagbasa.

b) Usa ka kampanyang pagtuon aron kusganong tun-an balik ang Konstitusyon sa Partido ug ang Programa alang sa Demokratikong Rebolusyon sa Katawhan.

c) Usa ka kampanyang pagtuon aron balik tun-an ang mga dokumento sa Una ug Ikaduhang Bantugang Kalihukang Pagtul-id, Ang Hinanali Natong mga Tahas ug Partikular nga Kinaiya sa Atong Gubat sa Katawhan, ug mga dokumento sa kasaysayan sa Partido.

d) Usa ka kampanya aron sumadahan ang atong mga kasinatian ug balik tun-an ang kanhing mga pagsumada aron maila ang Too ug "Walang" oportunistang mga tendensiya ug kasaypanan nga nagbunga og grabeng kadaut sa Partido ug armadong rebolusyonaryong kalihukan. Ang maong mga pagsumada angayang isulat ug isumite sa Komite Sentral. Ang pipila ka napiling artikulo imantala sa Ang Rebolusyon, ang teoretikal nga dyurnal sa Partido.

e) Usa ka kampanya sa katilingbanong pakisusi ug pagtuki sa hutong sa tanang ang-ang aron palalumon ang atong pagsabot sa kongkretong kahimtang sa masa ilalum sa nagkagrabeng krisis sa semikolonyal ug semipyudal nga sistema, nga nagtinguhang palambuan ang atong mga plano ug pamaagi sa pagpukaw, pag-organisa ug pagpalihok sa masa.

f) Kinahanglang ilunsad ang usa ka kampanya sa pagsaway ug pagsaway-sa-kaugalingon sa tanang ang-ang aron hiusahon ang Partido, ug tanang mga pwersa ug masang rebolusyonaryo.

g) Usa ka kampanya aron aseson ang pagpatuman sa tanang mga kadre sa Partido sa ilang mga gimbuhaton aron maila ang ilang mga kalig-on ug kahuyangan, ug makahimo og mga resolusyon aron dugang pakusgon ang ilang proletaryong disiplina, rebolusyonaryong panglan-

taw ug baruganan.

h) Usa ka nagpadayon nga kampanya aron siguruhon ang hingpit nga pagpatuman sa Tulo ka Angang nga Kurso sa Partido aron sigurhong makahuman ang wala pa.

Aron makatabang sa pagduso sa kalihukang pagtuon alang sa pagtul-id, tanang mga reperensya angayang adunay kopyang nakaprint o digital, lakip ang mga klasikong Marxista-Leninista-Maoistang mga sinulat, tanang batakang mga dokumento sa Partido, mga libro ug yaweng mga artikulo ni Ka Joma, ug uban pa. Kinahanglang siguruhon ang pagpasibantog niini pinaagi sa paghubad sa lain-laing mga pinulungan ug uban pang pamaagi.

Ang kalihukang pagtul-id usa ka ideolohikal nga pagsulay. Sa mosunod nga usa o duha ka tuig, kinahanglang kining kusganong ipatuman ug paningkamutan sa tanang angang gikan sa Komite Sentral sa Partido hangtud sa tanang mga sanga sa Partido. Masaligon kita nga dawaton sa kinabag-an sa mga myembro sa Partido ang kalihukang pagtul-id ug andam nga mapangahasong moaslang, sama sa dinagkung pagtikang sa rebolusyonaryong kalihukan human ang una ug ikaduhang kalihukang pagtul-id.

Samtang ginapatuman nato ang kalihukang pagtul-id, kinahanglang padayon nga pakusgon sa Partido ang iyang kaugalingon sa lalum ug lapad nga paggamot sa masa. Kinahanglang kab-oton sa mga rehiyonal nga komite sa Partido ang inisyatiba sa pagtukod sa mga teritoryal nga komite sa Partido aron maabot ang mga prubinsya, distrito, syudad ug mga lungsod nga anaa gawas sa langkub o erya sa operasyon sa mga gerilyang nataran sa BHB.

Makapila ka pilo nga padaghanon ang myembro sa Partido sa pagsunod sa prinsipyo sa mapangahasong pagpalapad sa Partido ug dili tugutang makasulod ang unsamang dautang elemento, nag-una pinaagi sa pagrekrut sa pinakabanteng mga elemento nga napamatud-an na ang ilang pagkamatinud-anon isip mga aktibistang masa

sa rebolusyonaryong kalihukang masa ug isip mga Pulang manggubat sa Bagong Hukbong Bayan.

Palig-onon ang demokratikong sentralismo ug ang sistemang komite sa Partido. Kinahanglang natong siguruhon ang balanse sa tigulang, hamtong ug batan-ong mga kadre sa nangulong mga komite sa Partido pinaagi sa mapangahasong pagtuboy sa mas taas nga pusisyon sa batan-ong mga kadre gikan sa han-ay sa mga mamumuo, mag-uuma ug petiburgesya sa kasyudaran. Kinahanglang natong palapdon ug pakusgon ang tago nga kutay sa Partido ug rebolusyonaryong kalihukan sa kasyudaran ug kabanikanhan aron ipabiling bungol ug buta ang kaaway.

Siguruhon ang pag-imprenta ug malukpanong pag-apud-apud sa Ang Bayan sa tanang myembro sa Partido ug mga rebolusyonaryong pwersa.

Kumprehensibong iaslang ang rebolusyon

Samtang ginapakusog nato ang Partido pinaagi sa kalihukang pagtul-id, kinahanglang natong kumprehensibong iaslang ang demokratikong rebolusyon sa katawhan isip pagpatuman sa kalihukang pagtul-id ug sukdanan sa kalamposan niini. Atong ipatuman ang mosunod nga mga tahas subay sa kinatibuk-ang tumong sa kumprehensibong pagpaaslang sa rebolusyon:

a) Pangulohan ang antipasista, anti-imperyalista ug antipyudal nga mga pakigbisog sa lapad nga masa sa katawhang Pilipino batok sa rehimeng US-Marcos.

Ang rehimeng US-Marcos ang kasamtangang pinakakonsentrang porma sa reaksyunaryong pasistang paghari sa nasud. Kinahanglang natong ibutyag ang tanang anti-katawhang palisiya niini nga nagsilbi sa interes sa monopolyo kapitalistang mga bangko ug kumpanya, sa geopolitikal nga interes sa imperyalismong US, sa makihutong nga mga interes sa dagkung burgesyakumprador ug dagkung agalong yutaan, ug sa pagpadatu sa mga kurakot nga burukrata. Sa ka-

samtangan, ang pinakakonsentrang porma sa nasudnon ug demokratikong pakigbisog sa katawhang Pilipino mao ang pagbatok sa madaugdaugon, pasista ug itoy-sa-US nga rehimeng Marcos.

Kinahanglang natong isumpay ug ipataas ang inadlaw-adlaw nga kinabuhi-ug-kamatayang pakigbisog sa lain-laing demokratikong hut-ong ug sektor sa pakigbisog batok sa imperyalismo, pyudalismo ug burukrata-kapitalismo. Kinahanglang natong ibutyag, ihimulag ug batukan ang rehimeng Marcos ug ipunting dinhi ang kasilag sa katawhan. Samtang ginapangulohan nato ang katawhan sa ilang pakigbisog alang sa hinanaling mga lakang (dugang-suhulan, ubos nga presyo, ubos nga abang sa yuta, subsidyo alang sa edukasyon ug panglawas, ug uban pa), kinahanglang natong ibutyag ang makihutong nga reaksyunaryong kinaiya sa nagharing estado, ug ilambigit ang pakigbisog alang sa reporma sa kinatibuk-ang rebolusyonaryong pakigbisog, nag-una pinaagi sa armadong pakigbisog, aron ibagsak ang nagharing sistema.

Sa mosunod nga tuig, kinahanglang kitang magtuon sa pagbutyag ug pagbatok sa mga palisiya ug programa sa ekonomiya nga ginapahamtang sa imperyalismong US pinaagi sa World Bank ug sa International Monetary Fund ug ilang alyadong mga institusyon sa pinansya sama sa Asian Development Bank sa Japan, nga walay-puas nga miyatak sa sosyo-ekonomikanhong mga katungod, nagbunga og malukpanong pagpangawkaw, pagkawala sa kita ug panginabuhian, ug dislokasyon sa ekonomiya.

Kinahanglang natong ibutyag ug batukan ang interbensiyong militar sa US ug ang nagkadakung presensyang militar sa US sa Pilipinas, pagtukod og dugang nga mga pasilidad militar sa US nga ginagamit sa niini isip lunsaranan sa duso niining pakusgon ang hegemonya sa rehiyon pinaagi sa pagpugong sa nagkakusog nga ekonomiya ug militar sa China, ug ang nagkagrabeng pagpanghagit batok sa mga imperyalis-

tang karibal niini, nga naghatag og risgo sa Pilipinas nga madamay sa usa ka inter-imperyalistang gubat.

b) Pakusgon ang Bagong Hukbong Bayan, mobangon gikan sa mga kapakyasan, ug subling tukuron ang baseng masa.

Kinahanglang pakusgon sa Partido ang pagpangulo niini sa BHB sa paglunsad og kaylap ug subsub nga gerilyang pakiggubat subay sa nagkalapad ug nagkalalum nga baseng masa. Kinahanglan niining ikumbina ang tahas sa pagpaasdang sa armadong pakigbisog sa pagpaasdang sa rebolusyong agraryo ug paglunsad sa mga kampanyang masang antipiyudal isip pamaagi sa pagtukod sa baseng masa ug pagtukod sa mga organo sa pulitikanhong gahum sa katawhan alang sa rebolusyonaryong pakigbisog ug pagdumala-sa-kaugalingon.

Kinahanglang ilunsad sa Partido ang subsub nga pagbansay sa mga Pulang kumander ug manggugubat aron patas-on ang ilang kapasidad nga mosukol, kahibalo sa siyensyang militar ug mga taktika, pulitikanhong kahimatngon, disiplina, pisikal nga kusog ug kalig-on sa hunahuna ug determinasyong mosukol ug abagahon ang gikinahanglang mga sakripisyo alang sa pagpaasdang sa gubat sa katawhan. Padayong pakusgon ang kapasidad ug puthaw nga disiplina sa BHB sa paglunsad og mga panagsangka nga paspas nga molampos, maayong paggamit sa mga taktikang gerilya sa pagbalhin-balhin, konsentrasyon ug dispersal ingonman ang paspas nga mga maniobra ug paglihok kakumbina ang taas nga ang-ang sa pagsekreto ug pamaagi sa pagtrabaho aron ipabiling bungol ug buta ang kaaway. Bungkagon ang kutay sa paniktik sa kaaway ug hikawan sa kapuslanan ang mga gamit niini sa sarbeylans, o gamiton kini batok kanila.

Tukuron ang mga gerilyang nataran nga may gidak-ong kumpanyan ug pabalud-balod nga moabant sa pagtukod sa mga gerilyang nataran ug baseng erya sa mga kabukiran, mga buntod, kapatagan, daplin sa suba, sa mga baybay ug

ngadto sa mayor nga mga linya sa transportasyon ug komunikasyon. Walay kapuul nga iasdad ang gimbuhaton sa ekonomiya, kultura, edukasyon, medikal ug produksyon aron abton ang pinakadakung ihap sa katawhan. Pwersahon ang kaaway nga inaton ang mga tropa niini ug hikawan kini sa kapasidad nga makalunsad og mga nakapokus nga opensibang militar.

Mobangon gikan sa mga kapakyasan ug subling tukuron ang baseng masa. Ilunsad ang rebolusyonaryong armadong pakigbisog kakumbina ang paglunsad sa lapad nga antipiyudal ug antipasistang kalihukang masa sa masang mag-uuma. Asaman gikinahanglan, maglunsad og mga asembleya tali sa masa ug sa BHB aron matagad ang mga mulo, maila ug masaway ang ilang mga kahuyangan ug kakulangan sa nangagi ug subling pahug-ton ang ilang panaghiusa ug ipataas ang ilang determinasyong hiniyang mosukol.

Maglunsad og batakan o anihilatibong taktikal nga mga opensiba nga kaya natong ipadaug subay sa atong kasamtangang kusog sa lapad nga eryang kamaniobrahan nga nagtunhay pinaagi sa pagpalapad sa mga gerilyang nataran. Ig-on ang nahimulag ug nakabulag nga mga yunit sa kaaway. Maglunsad og mga aktibong depensang pakiggubat ug kampanyang gerilya. Palihukon ang regular nga mga pwersang gerilya sa BHB ug milisyang bayan. Maghimo og lapad nga atritibong pakiggubat aron idisbalanse ang kaaway ug aron itago ang tinuod nga plano sa atong nag-unang pwersa. Maglunsad og espesyal nga mga operasyong partisano aron ig-on ang kaaway sa likuran niini. Silutan ang mga pinakadautang pasistang kriminal ug ang mga pinakalunod-patay nga traydor nga nahumod sa dugo sa katawhan. Magpatumaw og mga armas alang sa mga Pulang manggugubat sa pagsakmit niini gikan sa kaaway pinaagi sa taktikal nga mga opensiba o uban pang pamaagi.

Padayong pakusgon ang platun

isip batakang yunit sa BHB, ug tukuron ang istruktura sa kumand sa tanang ang-ang, gikan sa mga rehinyunal nga kumand sa operasyon hangtud sa nataran. Palig-onon ang mga sanga ug komite sa Partido sa hukbong bayan ug ang pulitikanhong organo sulod sa BHB sa tanang ang-ang aron padayong patas-on ang pulitikanhon ug makihut-ong nga kahimatngon sa iyang mga Pulang manggugubat.

Dugang pakusgon, bansayon ug paandaron ang mga yunit sa milisyang bayan, kakumbina ang mga yunit depensa-sa-kaugalingon sa rebolusyonaryong mga organisasyong masa, ug pakusgon ang gerilyang pakiggubat sa masa.

c) Pakusgon ug palapdon ang rebolusyonaryong kalihukang masa sa kabanikanhan.

Kinahanglang palambun sa Partido ug mga rebolusyonaryong pwersa ang usa ka lapad nga kalihukang antipiyudal ug antipasista sa kabanikanhan. Kinahanglang palihukon ang dakung ihap sa masang mag-uuma ug bungkagon ang nagharing puting teror nga gipahamtang sa pasistang AFP ug NTF-Elcac.

Palambun ug pangulohan ang lapad nga kalihukang masang antipiyudal subay sa minimum nga programa sa Partido alang sa reporma sa yuta. Kinahanglan natong pangulohan ug iasdad ang mga pakigbisog sa masa sa tibuok nasud alang sa mas ubos nga abang sa yuta, pagtapos sa usura, umento sa suhulan sa mga mamumuong-panguma, mas ubos nga presyo sa mga himan ug sangkap sa produksyon, ug makatarunganong presyo sa mga produkto sa umahan. Ipatuman ang kampanya sa katilingbanong pakisusi ug pagtuki sa hut-ong aron ilhon ang pinakahinanaling problema sa masang mag-uuma ug aron palambun ang mga pamaagi nato sa pagpukaw, pag-organisa ug pagpalihok kanila.

Palihukon ang masa aron batakan ang mga iskema sa kumbersyon sa yuta, pagguba ug pagkawaw sa panginabuhian sa mga mag-uuma sa

mga operasyon sa mina, pagpalapad sa mga plantasyon, ekoturismo, enerhiya ug proyektong imprastruktura ug uban pang dagkung langyaw ug lokal nga negosyo. Panalipdan ang ekonomikanhong interes ug mga katungod sa mga mag-uuma ug nasudnong minorya, nga nakakumbina sa pakigbisog batok sa langyawng mga burges ug monopolyong kumpanya ug sa pagpangawkaw ug pagguba sa kinaiyahan.

Sulod ug gawas sa mga gerilyang nataran sa BHB, kinahanglan natong tukuron ang pinakadakung ihap sa mga kahugpungang mag-uuma kauban dili lamang ang mga lalaki, kundili bisan ang mga babaye ug batan-ong mag-uuma, samtang ginatukod usab ang mga organisasyon sa mga kabatan-onan ug kababayan-an, lakip na ang mga pangkultura ug uban pang tipo sa kahugpungan. Palapdon ug pakusgon ang lapad nga organisasyon sa mga nasudnong minorya aron panalipdan ang ilang yutang kabilin ug ias-dang ang ilang pakigbisog alang sa awtonomiya ug kaugalingong paghukum.

Pakusgon ang mga antipasis-tang pakigbisog sa kabanikanhan. Ang antipasis-tang pakigbisog hugot nga nakasumpay sa kalihukang anti-pyudal. Ibutyag ug batukan ang mga paglapas sa mga pasistang pwersa sa estado sa tawhanong katungod ug internasyunal nga makitawhanong balaod. Palihukon ang masa aron batukan ang militarisasyon sa ilang mga komunidad ug ang "pagpasurender" sa katawhan sa takuban sa Retooled Community Support Program (RCSP) ug Enhanced Community Livelihood and Integration Program (E-CLIP).

Pakusgon ang propaganda aron batukan ang saywar sa kaaway ug ipataas ang militansya sa katawhan aron batukan ang pasistang pagpanumpo, ug suportahan ang rebolusyonaryong armadong pakigbisog. Ibutyag ug batukan ang mini nga programang amnestiya sa rehimeng Marcos nga nagtinguhang maniak ug pahuyangon ang rebolusyonaryong paghukum sa rebolusyonar-

yong armadong kalihukan ug masa nga batukan ang papet nga estado sa dagkung kumprador ug hut-ong agalong yutaan. Sistematikong ipatuman ang kampanya sa pagrekrut sa han-ay sa masang mag-uuma, ilabina sa mga kabatan-onan, nga mosampa sa Bagong Hukbong Bayan.

d) Pakusgon ang rebolusyonaryong kalihukang masa sa kasyudaran.

Kinahanglan natong pakusgon ang rebolusyonaryong kalihukan sa kasyudaran, sulbaron ang dugay nang mga problema ug paningka-mutang mapalihok ang nagkadakung ihap sa masa. Kinahanglang palihukon ang atong mga pwersa sa malukpanon ug makugihong pagpropaganda ug pagorganisa aron minilyong abton ang lapad nga masa. Sa tanang panahon, ipatuman ang linyang masa sa pagsalig ug pagsandig sa masa. Kinahanglang hugot nga makighiusa ug palihukon ang abanteng mga elemento sa masa, ug mosandig kanila sa pagpataas sa ang-ang sa hatungang mga elemento, ug kabigon ang mga atrasadong elemento.

Kinahanglan natong palambuan nag-una ang lig-on, militante ug lapad nga kalihukang unyon ug kalihukang welga sa han-ay sa mga mamumuo, aron makigbisog alang sa makatarunganong suhulan atubangan sa pagsaka sa gasto sa panginabuhi, ipakigbisog ang pagpamaayo sa kahimatang sa pagtrabaho batok sa nagkagrabeng porma sa pagpahimulos ug batukan ang pasistang pagpanumpo. Dungan niini, kinahanglang tukuron ang hukbo sa matngon-sa-hut-ong nga mga mamumuo pinaagi sa pagpataas sa ilang pulitikanhon ug rebolusyonaryong kahimatngon, isumpay ang ilang pakigbisog sa ekonomiya ug unyon sa nasudnon ug demokratikong mga pangayo sa katawhang Pilipino, ug sa kinatibuk-ang rebolusyonaryong pakigbisog.

Kinahanglan usab nga pakusgon ang rebolusyonaryong kalihukang masa sa han-ay sa semi-proletaryado ug dinaghan silang palihukon su-

bay sa ilang mga tataw nga isyu.

Kinahanglang pakusgon ang nasudnon-demokratikong kalihukan sa han-ay sa mga estudyante aron dinaghan silang palihukon para militanteng ipakigbisog ang ilang mga katungod ug kaayuhan, ias-dang ang nasudnon-demokratikong propaganda sa ilang han-ay, ug iugnay sila sa pakigbisog sa lapad nga masang mamumuo ug mag-uuma.

Palig-onon ug dugang palagsikon ang kalihukang masa sa lain-lain-demokratikong sektor.

Kinahanglan natong pakusgon ang rebolusyonaryong kalihukangtago. Ipataas ang kapasidad, disiplina ug determinasyon sa mga kadre sa Partido ug rebolusyonaryong organisador nga atubangon ang mga sakripisyo aron siguruhon ang ilang seguridad ug ang seguridad sa ilang mga kolektibo ug sa organisadong masa batok sa sarbeylans ug pasistang kabangis sa kaaway, pinaagi sa pagputol sa ilang *fixed points* ug taas nga linya sa sarbeylans. Kinahanglang ipataas ang ilang kahimatngon sa pagpatuman sa mga lagda ug pamaagi sa kalihukangtago. Kinahanglang ipataas ang ilang kahimatngon sa mga palisiya ug pamaagi sa hanas nga paggamit sa modernong himan sa komunikasyon, ug kanunay matngon sa mga bulnerabilidad niini.

Ilunsad ang malukpanong propaganda aron suportahan ang rebolusyonaryong armadong pakigbisog isip nag-unang porma sa pakigbisog para ias-dang ang demokratikong rebolusyon sa katawhan. Tigumon ang tanang posibleng suportang materyal ug pinansyal alang sa mga Pulang manggugubat sa BHB. Ipatuman ang mga kampanya sa pagrekrut sa BHB ilabina sa han-ay sa mga mamumuo, kabatan-onan ug intelektwal.

e) Tukuron ang pinakalapad nga antipasista, anti-imperyalista ug antipyudal nga nagkahiusang prente batok sa rehimeng US-Marcos.

Kinahanglang padayon natong pakusgon ug palapdon ang National Democratic Front of the Philippines

ug tanang alyadong organisasyon niini ilalum sa pagpangulo sa Partido. Tigumon ang pinakalapad nga pulitikanhon ug materyal nga suporta sa katawhan para sa rebolusyonaryong armadong pakigbisog.

Kinahanglan natong tukuron ang pinakalapad nga nagkahiusang prente aron ihmulag ug batukan ang rehimeng US-Marcos. Kinahanglang padayon natong ibutyag ang *automated* (de-kompyuter) nga pagpanglimbong sa eleksiyong 2022 ug ang mini nga "landslide victory" sa tandem nga Marcos-Duterte. Kinahanglang kuhaon ang suporta sa lapad nga mga pwersang anti-Marcos-Duterte nga misukol kang Marcos niadtong eleksiyong 2022 ug minilyong nagrali kaniadto sa kadalanan.

Kinahanglang magtukod kita og lain-laing porma ug ang-ang sa *long-term* o *short-term* nga alyansa batok sa *charter change*, Maharlika Investment Fund, makapiang nga mga neoliberal nga ekonomikanhong palisiya, mga pasilidad militar sa US, ug uban pang yaweng isyu nga nakasumpay sa nasudnon ug demokratikong pangandoy sa katawhang Pilipino. Ipadayon ang pagpalig-on sa atong relasyon sa katawhang Moro ug sa ilang mga rebolusyonaryong pwersa aron ipadayon ang ilang pakigbisog alang sa tinuod nga awtonomiya ug nasudnong kaugalingong paghukom.

Kinahanglang pahimuslan ang bangi sa han-ay sa nagharing pun-

dok sa mga Marcos ug Duterte, pinaagi sa pagpanubag ug pagsilot kang Duterte ug sa iyang mga alipures sa ilang mga krimen niadtong sila ang anaa sa poder. Kinahanglang andam natong palihukon ang katawhan batok sa posibilidad nga mahimong maduguon ang panaglantuging Marcos-Duterte sa porma sa kudeta o balaod militar.

Palig-onon ang pagrepresenta sa NDFP sa demokratikong guberno sa katawhan sa panaghisgot kalinaw subay sa mga prinsipyo sa makatarunganon ug malahutayong kalinaw. Ibutyag ug batukan ang pakana sa rehimeng US-Marcos nga ipahamtang ang gambalay sa pagpasunder sa panaghisgot kalinaw. Iduso ang pag-ila sa tanang naunang kasabutan lakip ang The Hague Joint Declaration, ang Joint Agreement on Safety and Immunity Guarantees (JASIG) ug ang Comprehensive Agreement on Respect for Human Rights and International Humanitarian Law (CARHRIHL).

f) Pakusgon ang atong internasyunal nga rebolusyonaryong gimbuhaton.

Kinahanglang padayon nga isumpay ang rebolusyong Pilipino sa kalibutanong kalihukang anti-imperyalista ug sa proletaryong rebolusyon sa tibuok kalibutan.

Kinahanglang ipataas nato ang ang-ang sa kampanya aron kabigon ang suportang internasyunal alang sa rebolusyonaryong kalihukan sa

Pilipinas, samtang nagahatag sa tanang porma sa suporta sa mga hutong mamumuo, ug demokratiko ug anti-imperyalistang pakigbisog sa lain-laing bahin sa kalibutan.

Kinahanglang ipatuman ang lagsik nga kalihukang propaganda ug pag-organisa aron abton, pukawon, organisahon ug palihukon ang mga mamumuong Pilipino sa ubang nasud ug mga "kababayan" o mga Pilipino nga nanimuyo na sa lain-laing nasud ug mga rehiyon sa kalibutan, ug isumpay ang ilang pakigbisog alang sa ilang katungod ug kaayuhan sa pakigbisog batok sa anti-katawhang rehimeng US-Marcos ug sa palisiya niining "labor export." Awhagon ang atong mga kababayan nga aktibong iasadang ang kalihukang propaganda aron ibutyag ang anti-katawhan, papet ug pasistang rehimeng Marcos. Ipataas ang rebolusyonaryong kahimatngon sa mga migranteng Pilipino ug awhagon silang mosalmot sa rebolusyonaryong pakigbisog sa Pilipinas.

Kinahanglang padayon nga pakusgon ang panag-igsoonay sa mga partido ug organisasyong Marxista-Leninista-Maoista, pakusgon ang komunistang diyalogo ug pagtinabangay. Ilunsad ang aktibong pakigbangi sa ideolohiya aron ibutyag ug isalikway ang modernong rebisyunismo, Trotskyismo, Gonzaloismo ug uban pang rebisyunistang dagan nga nagatuis sa Marxismo, Leninismo ug Maoismo.

Maghiusa ug suklan ang paantus ug pasistang rehimeng US-Marcos!

Pangulohan ang pakigbisog sa katawhang Pilipino batok sa imperyalismo, pyudalismo ug burukrata-kapitalismo!

Iasadang ang demokratikong rebolusyon sa katawhan hangtud sa hingpit nga kadaugan!

Mabuhi ang Marxismo-Leninismo-Maoismo!

Mabuhi ang kabilin ni Ka Joma!

Mabuhi ang proletaryo ug katawhang Pilipino!

Mabuhi ang Bagong Hukbong Bayan!

Mabuhi ang National Democratic Front of the Philippines!

Mabuhi ang Partido Komunista ng Pilipinas!